



## Հայկական գիտահետազոտական հանգույց Armenian Research & Academic Repository



Սույն աշխատանքն արտոնագրված է «Ստեղծագործական համայնքներ  
ոչ առևտրային իրավասություն 3.0» արտոնագրով

**This work is licensed under a Creative Commons Attribution-NonCommercial  
3.0 Unported (CC BY-NC 3.0) license.**

Դու կարող ես.

պատճենել և տարածել նյութը ցանկացած ձևաչափով կամ կրիչով  
ձևափոխել կամ օգտագործել առկա նյութը ստեղծելու համար նորը

You are free to:

**Share** — copy and redistribute the material in any medium or format

**Adapt** — remix, transform, and build upon the material

ՀԱՄԱԼԵԱՆՑ Ս.

Խ Ո Ւ Լ

Խ Ա Չ Ի Կ

ՊԱՏՄԱԿԱՆ Վ.Լ.ՊԻԿ

(ժԱ. դարձ տնայր).


ԵՐԿՐՈՐԳ ՏՊԱԳՐՈՒԹԻՒՆ

ԳՐԵՆ Է 25 ԿՈՊ.

Թ Ի Յ Լ Ի Ս

Տպարան «ՀԵՐՄԻՍ» ԸՆԿ. Ետպաշենի փողոց № 15  
1905

(99)



13 APR 2011

891.99

ՔԱՄԱԼԵԱՆՅ Ս.

Բ-17

սթ.

# ԽՈՒՆ ԽԱԶԻԿ

ՊԱՏՄԱԿԱՆ ՎԷՊԻԿ

(ԺԱ. դարու անցք).

ԵՐԿՐՈՐԴ ՏՊԱԳՐՈՒԹԻՒՆ

1920



Թ Ի Յ Լ Ի Ս  
 Տպարան «ՀԵՐԱԿ» ՀճԿ. Մադարեան փողոց № 15  
 1905 (99)



# ԽՈՒԼ ԽԱՉԻԿ

Ա.

Վասպուրականը շատ գաւառներ ունէր: 1021 թուից ամենն էլ մնացել էին անտէր ու անխրնամ. նրանց տէրերը Արծրունի Սենքերբիւմ թագաւորի հետ հեռացել, գնացել էին Սեբաստիայի կողմերը:

Միայն մի գաւառ իւր տէր ու իշխանն ունէր. որը չէր միւսների նման:—Թոռնեանն էր այդ, և նրա տէրը Խաչիկ Արծրունին, մականունով Խուլ: Միակ իշխանն էր, որ թագաւորի և բոլոր պաշտօնեաների կամքի հակառակ վճռել էր մնալ իւր հայրենի հողի վրայ. գերադասել էր իւր աշխարհի թշնամիների դէմ՝ քանի շունչը բերանումն է, կռուելով մեռնել, քան թէ օտարին ծառայելով փառք մուրալ, պատիւներ ստանալ:

Եւ ի՞նչ կրտսագար Խաչիկին մուրացկանութիւնը: Չէ՞ որ նրա միայն անունը սարսափ էր ազդում թշնամուն: Ամեն տեղ յաղթող էր, ինչպէս անպարտելի զիւցագն և հուժկու ու վսեմ,

---

Дозволено цензурою. Тифлисъ, 20 Мая 1905 г.

---

ինչպէս առիւծ: Իրա համար էր, որ Արծրունեաց գլխապետ Սաշիկից որոշելու համար ժողովուրդը Թոռնեանի տիրոջը անուանում, կանչում էր Առիւծ Սաշիկ:

Երկար տարիներ նրա ոսկորն ու կաշին մխուել, ամրապնդուել էին անթիւ պատերազմների շկահիւնների մէջ: Միակ մարդն էր, որ անհաշտ թշնամի էր հայրենի գահը վտանգողին: Սենքերիմի ժամանակ քանի՞ անգամ յարձակուեց թաթար ու յոյն ասպատակ զօրքերի վրայ ու սահմաններից դուրս քշեց. բայց ծերունի թագաւորը խօսքով անգամ չըքաջալերեց նրան, այլ սրտապատառ թողնելով հայրենի երկիրը վերկացաւ, իւր հետ առաւ զօրքն ու ժողովրդի մի մասը և գնաց...:

Մնաց Սաշիկը կոնատուած և ահամայ յոյն կուսակալների առաջ ճկուած:

Սենքերիմի հետ կապած դաշնագրի համաձայն յոյները տէր դարձան Վասպուրականին: Եկան կուսակալներ, կառավարիչներ. անծանօթ լինելով երկրին, ժողովրդին՝ փոխուեցին իրար ետնից:

Սաշիկը քաշուած իւր Թոռնեան գաւառի Եկան բերդը, ապրում էր այնտեղ Հասան և Շնճղուկ քաջ որդիների հետ: Յոյն կուսակալները պատկառելով նրանից չէին խառնուում նրա գաւառի գործերի մէջ: Նա անկախ էր իբրև ազատասէր հոգի և այդպէս էլ մնաց մինչև 1034 թ.:

Հօր առիւծի պէս Սաշիկը փակուած էր պառագիղի մէջ: Նրան շատ էին առաջարկում կայսեր բանակում զօրավարի պաշտօն ընդունել և աննշան Թոռնեանը թողնել, բայց նա ոչ միայն ինքը չէր յօժարուում, այլ որդոցն էլ խորհուրդ չէր տալիս, որ գնան նենգաւոր օտարին փառքի համար ծառայեն:

Երբ նկատում էր, որ մի քանի հայ իշխաններ՝ արաբ ամիրապետի ընծայած զգեստներով զարգարուելով կամ կայսեր ուղարկած ոսկիներով հպարտանալով՝ ուղում են իւր որդոցը գայթակղեցնել ու իրանց շաւղով տանել, Սաշիկը այդպիսիներին անխնայ շանթում էր թէ խօսքով և թէ գործով: Իրանով նա հակառակորդներ շատ էր վաստակել: Նրան խուլ էին կանչում, բայց մեծ խուլը իրանք էին, որ փառամոլութեամբ ու օտարասիրութեամբ կուրացած և խլացած՝ ոչ տեսնում էին հայրենիքի բաժան-բաժան լինելը և ոչ լսում նրա դառն հեծեծալը:

Այս ամենը տեսնում ու զգում էր Սաշիկը. սրտի կսկրծից վիրաւոր առիւծը մտնչում էր և խոշոր ընչացքները ոլորելով ման ու ման անում Նկան բերդի աշտարակի առաջ:

Ամբողջ 13—14 տարի էր, որ Սենքերիմը հեռացել էր Ոստան մայրաքաղաքից. այդքան միջոցում անթիւ կառավարիչներ էին նշանակուել և անդադար փոխուել: Մինը միւսից վատթար և կեղեքիչ հոգիք:

Այդ ամենը դիտում էր աչքի տակով Սաշիկը, խոր խոցւում և Վասպուրականի սև օրը լայիս:

**Բ.**

1034 թ. էր և Վասպուրականի վրայ կայսեր կողմից կառավարիչ էր նշանակուած Մանեակը: Մրա սկանչը շատ աննպաստ տեղեկութիւններ էին հայել Սաշիկի մասին. ասել էին չար անձինք, որ նա տէր ու իշխան է Վասպուրականի, որ նա հնազանդել չի կամենում կայսեր, որ նա մտադիր է իրան թագաւոր հռչակել Սենեքերիմի տեղ իբրև Արծրունի:

Միբայել կայսրը, որ յունաց գահը արիւնով էր յափշտակել, հայոց թագն էլ ժառանգելու խիստ ծարաւ ունէր, հաշտ աչքով չէր նայում Սաշիկի պէս դիւցազնի վրայ՝ նրա մասին այնչափ կասկածներ լսելուց ետը: Վճուել էր նրան Հայաստանի սրտից հանել և Արծրունի տոհմի ազդեցութիւնը ժողովրդի միջից իսպառ ջնջել:

Մանեակը Վասպուրական ժամանելուն պէս առաջին գործն այն արեց, որ հրաւիրեց իւր մօտ Սաշիկին: Քաղցր ընդունելուց ետ շատ ընծաներ առաջարկեց այն պայմանով, որ համաձայնի գորավարի պաշտօն ստանձնել և կայսեր գորքում ծառայել:

— Կայսրը պատերազմի է պատրաստուում, ասեց Մանեակը, փորձառու գորավարների և կտրիճ զինուորների չափազանց կարիք ունի: Ինչ-

չո՛ւ ես անգործ հստել. փառքն ու պատիւը քեզ ու քո կտրիճ որդիներին են սպասում: Այստեղ, այս աւերակ Վասպուրականում ի՞նչ կայ, որ նրստել ես:

— Ես արևոր, ուժից ընկած մարդ եմ, պատասխանեց Սաշիկը, այսուհետև ինձնից ի՞նչ օգուտ կարելի է յուսալ: Այսօր կամ վաղը շունչս փչելու եմ. աղաչում եմ, տէր, թողէք իմ հողի մէջ թաղուեմ: Այդ մխիթարութիւնից մի զըրկէք ինձ:

— Որդիներդ համար ի՞նչ կասես, նրանք հօծեր չե՞ն, հարցրեց կուսակալը ժպտալով:

— Տէր իմ, նրանք ծեր չեն, բայց այնքան խելահաս չեն, որ օտարութիւն զնան ու իբրև գորավար շահուէտ լինեն: Նրանք դեռ շատ մատաղ են և հազիւ կարողանում են թոռնուանի սահմանները պտրտել: Զօրք կառավարելու մէջ նրանք անվարժ են, տէր իմ:

Սաշիկն համ այս խօսքերն ասում էր, համ դողդողում, զգալով իւր ստախօսութիւնը:

Նրա որդիքը ոչ թէ մատաղ, այլ մի մի հրակայ էին համեմատելով հէնց Մանեակ կառավարչի հետ, որ քաջ գորավարի հռչակ էր վայելում ամբողջ կայսրութեան մէջ: Զօրք բանացնելու և ձակատներ կազմելու մէջ Հասանն ու Ճնճղուկը, եթէ Սաշիկին հաւասար չէին, գէթ սլակաս էլ չէին նրանից, որովհետև ինքն էր մարդել ու վարժել նրանց, որ իւր մահից ետ թոռնու-

նը պարծենալու իրաւունք ունենայ իւր իշխաններով:

— Ինչ վերաբերում է նրանց անվարժութեան, անհոգ կաց, իշխան, վրայ բերեց Մանեակը, այդ պակասութիւնը հեշտ է լրացնելը: Միայն այն է ինձ դժուարութիւն պատճառում, որ դու ասում ես, թէ նրանք շատ մատաղ են: Կանչել տներ, տեսնենք: Ինչքան էլ տարիքով փոքր լինեն, ես կարծում եմ, նրանք կտրուկ ու փարթամ կը լինեն իբրև կորիւններ:

Յետոյ կառավարիչը Խաչիկի սիրտը շահելու համար աւելացրեց.

— Ձէ որ նրանք Առիծ Խաչիկի որդիներն են: Ծեր Խաչիկը հէնց այդտեղ սրտումը լաց եղաւ, տեսնելով, թէ ինչ խորամանկ, քաղցրալեզու աղուէսի է պատահել. ահով գուշակում էր, որ այդ քաղցր լեզուն կարող է իւր որդիներին գլխից հանել: Իշխանը Մանեակին ասեց.

— Կարիք չկայ ուրիշ մարդ ուղարկելու, ինքըս կը գնամ և իմ որդոց կը բերեմ:

Նկան բերդը հասնելով Խաչիկը ժողովեց որդոցն իւր մօտ և տխուր ձայնով խօսեց.

— Այժմեան կուսակալը, որդիք, մի վտանգաւոր անձն է. ինչպէս նկատում եմ, ուզում է Թոռնեանը Վասպուրականի միւս գաւառների օրին հասցնել: Արծրունեաց ճրագի վերջի պատրոյգը հանգցնելու ետնից է: Թոռնեանի ապահով վիճակը և անկախութիւնը փուշ է դարձել ծա-

կում ամենի աչքն էլ: Մեր երկիրը աւերելու համար աշխատում են մեզ մեր հողից ու ջրից հանել: Այդ չար նպատակը յայտնի կերպով անկարող լինելով գլուխ բերել, առաջարկում են ինձ գորավարութիւն յանձ առնել կայսեր բանակում: Ի հարկէ ես մերժեցի: Բայց այժմ ձեզ են ուզում առաջարկել այդ պատիւը, հետն էլ շլացնող խոստումներ: Խորամանկները երբ չեն միամիտներին այդ միջոցներով գայթակղեցրել ու խաբել: Սկզբից յայտնելով ձեզ այս մասին զգուշացնում եմ, երբ յոյն կուսակալին կը ներկայանաք, խոհեմ խօսեցէք, աւելորդ բառ բերաններիցդ չըթոցնէք: Զսպեցէք ձեր եռանդը, երբ նա ձեզ գովելիս կը լինի: Մեղք եկէք ծերութեանս ալիքներին. ոչ մի խոստումով չըյօժարուէք նրա առաջարկն ընդունելու, եթէ անգամ նա ձեզ թագաւորութիւն խոստանայ:

Այս նախապատրաստութեամբ Խաչիկը որդիների հետ ձի նստած գնաց Ոստան, ուր սովորաբար լինում էր կուսակալի աթոռը:

Մանեակը Հասանին ու Ճնճղուկին տեսնելուն պէս հիացաւ, ապշեց նրանց պարթև ու աննման հասակի վրայ.

— Խաչիկ իշխան, ոչ միայն ես, այլ և Միքայէլ կայսրը կը նախանձի բո վիճակին: Սրանց համար էլի ասում, թէ մատաղ են, փոքրահասակ են: Միթէ չարախօս չէ՞ այն մարդը, որ զլանում է սրանց դիւցազուններ անուանել: Ի՛սկ



դիւցազուններ են և բոլորովին արժանի կայսեր տեսութեան: Այսպիսի աննման կտրիճների պատճառով է, որ Հայաստանն այնքան սիրելի է կայսեր աչքում: Թէև այսօր իշխանագուն են, բայց թագաւոր լինելու էլ ասող ունեն: Իբրև քո բարեկամ ես ոչ մի պայմանով չեմ յօժարուիլ, որ այս փայլուն աստղերը մութ աշխարհում խաւարեն, անյայտանան: Սրանց ինձ մօտ կը պահեմ ու վերջն էլ կը տանեմ կայսեր պալատը, որ նրա մօտ պատիւներով պսակուեն ու ապագայում գալով թագաւորեն իրանց աշխարհի վրայ.

Ապա դառնալով պարթևահասակ Հասանին ու ճնճղուկին խօսեց.

— Քնձ իշխանագունք, լսեցի՞ք թէ ձեզ ինչ փառքեր են սպասում: Ուրեմն մօտ եկէք և կայսեր պատկերի առաջ չոքեցէք: Թող այդ սպացոյց լինի, որ դուք կամք և յօժարութիւն ունէք կայսեր ծառայելու:

Պատանիքը սկզբում տեղն ու տեղը մնացին մեխուած՝ իրանց հօր երեսը նայելիս: Չգիտէին ի՞նչ ասեն, ի՞նչպէս վարուեն, որ ոչ կուսակալի պատուաւոր առաջարկը մերժեն և ոչ հօր գայրոյթը զրգուեն:

Մանեակը խորամանկ ազուէսի պէս իսկոյն հասկացաւ պատանիների հայեացքից նրանց սրտի մտածմունքը: Նկատեց որ նրանք կարմրում են հօր երեսը նայելիս, և չեն համարձակում իրանց սրտինն ասել, որ եկել էր լեզուին դէմ ընկել:

Առաջուց խոստումների, պատիւների մասին խօսելիս նկատել էր, որ իշխանագունների աչքերը ազահութիւնից փայլում են: Գուշակում էր, որ որդոց ասելիքը հօր սրտովը չպիտի լինի: Դժուարութիւնը հեռացնելու համար Մանեակը դարձաւ Խաչիկին ասեց.

— Որդիներդ նախ քան խօսելը երևում է, իրաւունք են ուզում խնդրել: Կեցցեն խոնարհ դաւակնները: Իրաւունք ես տալիս, որ ազատ խօսեն:

Խաչիկը որ աւելի շուտ էր կարդացել անփորձ և միամիտ կորիւնների աչքերում նրանց սրտինը, չիմացաւ ի՞նչպէս գսպի իւր յուզմունքը, շտապով վրայ բերեց.

— Իրաւունք ունեն խօսելու... բայց կարող են սխալ խօսել, չափազանց եռանդը առ հասարակ արգելք է լինում ճիշտ դատելու: Չէ՞ որ նրանք եռանդոտ կորիւններ են միայն:

— Ընդհակառակը նրանք չափահաս մարդիկ են, աւելացրեց Մանեակը: Յետոյ դառնալով նրանց.

— Ապա, խօսեցէք համարձակ, ձեր հօր հետ ես ևս իրաւունք եմ տալիս: Կամենում էք ձեր հայրենիքին օգտաւէտ լինելու համար կայսեր բանակի մէջ ծառայել: Եթէ համաձայն էք, չօքէք կայսեր պատկերի առաջ և երդուեցէք:

— Յօժար ենք, միաձայն գոչեցին տխմարացած Հասանն ու ճնճղուկը և առաջարկը կատարեցին խոնարհութեամբ:

Մանեակ կուսակալը այն ժամանակ ներկայ եղողներին առաջ ուրախագէ՛մ յայտարարեց հետևեալը:

— Այսօրուանից ձեզ ընդունում եմ ձեր զօրքով մեր բանակի մէջ: Վաղն և եթ հզօր կայսրին կաւետեմ այդ մասին:

Յետոյ դէպի Սաչիկը դառնալով ասեց.

— Շատ հայրեր երանի կըտան քեզ, երբ որդիքդ փառքով ու բարձր աստիճաններով փարթամացած կը վերագառնան իրանց աշխարհը:

Սաչիկը յուզմունքից մի խօսք անգամ չկարողացաւ արտասանել կուսակալի մօտ. մնաց կարկամուած: Ո՛ւնից, սր իշխանից թեթևամտութիւն, անհնազանդութիւն ասէին, Սաչիկի հաւատալը կը գար, բայց իւր հարագատ Հասանից ու Ճընճղուկից այդպիսի դաւաճանութիւն, երբէք չէր սպասում:

Նկան բերդը դառնալով սրտամորմօք հառաչում էր աւագ աշտարակը քաշուած.

— Ա՛խ, թեթևամիտ գաւակներ, դո՛ւք էլ ապերախտ ժառանգներ հանդիսացա՛ք: Ձեզանով յոյս ունէի կորցրածը գտնել, տանուլ տուածը վերագարձնել, ինչո՛ւ յաւիտեան ձեր ծերունի հօրից խլեցիք այդ միսիթարութիւնը: Մի՞թէ ձեզ գրկումս նրա համար խնամեցի, որ վերջը գնաք օտարին ծառայէք, նրան խոնարհ վիզ թեքէք. ինչո՛ւ յօժարակամ ընդունեցիք այդ լուծը:

Հասանի ու Ճնճղուկի սիրտն ու հոգին

անուած, վարժուած էին պատերազմի համար. իրանք կըրահոտ էին, բայց երկար ժամանակ անգործ նստած հայրական բերդում: Ոչ ոք չէր համարձակվում շրջակայ թշնամիներից Թոռնեանի վրայ յարձակում անել: Ձանձրացել էին կարծես պարապութիւնից: Այդ միջոցին անուանի Մանեակը նրանց առաջարկում է մեծամեծ պատիւներ, միայն թէ յանձն առնեն հայկական զօրքով կայսեր բանակում ծառայել: Եռանդները շատ, գայթակղութիւնը մեծ: Սաբուեցին և իրանց որոշման վրայ մնացին հաստատ. ահանջ չդրին հօր ոչ թախանձանքներին, ոչ յանդիմանութիւններին, ոչ սպառնալիքներին:

Սաչիկը չէր կարողանում կուսակալի ներկայութեամբ ակնյայտնի ընդդիմանալ որդիների գնալուն. բայց երբ Հասանն ու Ճնճղուկը՝ Թոռնեանի հինգհազարեան զօրագնդի գլուխն անցած՝ ուղևորում էին Նկանայ բերդի տակով դէպի Կ. Պօլիս, առիւծասիրտ Սաչիկը խորխտաձայն գոռաց բարձրից, աւագ աշտարակից.

— Գնացէք, անուշակալ սրդիք, գնացէք, բայց կը հասնի մի ժամ, մի օր, երբ կարեւիւր սրտով կը փոշմանէք ձեր արածի վրայ: Դեռ միամիտ էք. դառն փորձերից ետ կը հասկանաք միայն, թէ հայրենիքի փուշը սրքան քաղցը է օտար շնուշից: Գուցէ մի օր կը վնասուէք ինձ որ խոստովանէք, թէ սրքան ճշմարիտ էին ասածներս, բայց այն ժամանակ գերեզմանս միայն կը գտնէք...

Գ.

1040 թ. Վասպուրականը ներկայացնում էր մի անտէր, քարուքանդ այգի: Ով ասես, տէր էր և հրամայող: Մի կողմից արաբն էր կողոպտում, միւս կողմից թաթարն աւերում: Ժողովուրդը բացի այդ ատպատակներին լիացնելուց՝ խոնարհութեամբ յունաց կայսրին էլ հարկ էր տալիս, իբրև խնամակալի... բարեգնութ խնամակալ, որ բարբարոսների ճանկերից մնացածն էլ ինքն էր խլում:

Այդ նեղութիւնների տակ տառապում էր հայ ժողովուրդը և հեծում:

Խաչիկ իշխանը ամենն էլ տեսնում էր: Նախ մորմոքում էր սրտում, բայց նկատելով որ հայ ժողովուրդը վախից խոնարհութեամբ տանում է ամեն տանջանք, աւելացնում էր.

—Արժանի է քեզ այդ լուծը, տանջուիք, հայ ժողովուրդ, քանի որ վախկոտ ես: Քեզ ո՞վ էր ասում ձեռներդ ծալես, քեզ ո՞վ էր ասում յոյսդ ուրիշի վրայ դնես:

Խաչիկին այսպէս խօսելիս տեսնողը կրկարծէր, թէ նա անկարեկից էր դէպի ժողովուրդը: Ոչ, նա շատ աւելի էր մղկրտում հայ գաւառների աւերմունքը խելիս, բայց... ձեռովը աւելի բան չէր գալիս: Հազիւ կարողանում էր իւր Թոռնեւանը ազատ և անվրտանդ պահել յարձակումներից: Եւ այդ պարտական էր ոչ թէ յունաց խրնամակալութեան, այլ իւր անունին, վաղեմի բա-

Չագործութիւններին: Այժմ նա դառամեալ ծերունի էր, եօթանասուն տարեկան: Նախկին վիթխաբի հասակը, որ մամռոտած կաղնու բնի նմանութիւն ունէր, այժմ արևակէզ հասկի պէս կծղելու վրայ էր:

Հասանի և Ճնճղուկի հեռանալը շատ խոր էին ազդել Սուրճ իշխանի վրայ: Վեց-եօթ տարի էր, որդիքը պանդխտութեան մէջ էին և դեռ վերադառնալու մի լուր չկար: Ամեն անգամ իւր կտրիճներին մտաբերելով հառաչում էր դառնապէս.

—Ա՛խ, անհնազանդ որդիք, ո՞ւր էք: Գեռ խելքի չեկա՞ք, որ ձեզ պատուի համար չտարան, այլ պատուաւոր արսորի: Չէ՞ որ կուսակալի պաշտօնով էիք դառնալու հայրենիք. ո՞ւր էք, տըլումարներ...

Անթիւ վշտերի դէմ Խաչիկը մի անուշ սփոփանք ունէր, որով նրա սիրտը մխիթարւում, բացւում էր: Հասանի ու Ճնճղուկի բացակայութեան միջոցին իւր ձեռի մէջ մի ծաղիկ ունէր, որից նա կարողանում էր ստանալ իւր սրտի ուզած ամեն հոտ ու կարօտ:

Գա իւր ծերութեան նեցուկ—վերջին կտրիւնն էր, մի կայտառ, մի սիրուն տղայ: Հասակով ընդամենը տասնութեց տարեկան, բայց ուժով ու խելքով մի հասուն տղամարդ:

Իշխանիկ էր անունը, հօր աչքի լոյսը, կոտրած սրտի միակ յոյսը:

Թէկուզ մի օր, մի հատիկ օր նրան չտեսած՝  
թէկուզ իւր կեանքը մարած, միևնոյն էր Սաշի-  
կի համար:

Փոքրուց հօր ծնկի վրայ էր մեծացել Իշխա-  
նիկը: Իւր սուր դատողութիւնով և խելացիու-  
թիւնով ամենի գարմանքը բերում էր. դրա պատ-  
ճառն այն էր, որ Սաշիկ Արծրունու պէս փոր-  
ճառու և հմուտ դաստիարակ էր ունեցել, նրա  
բերանից լսել ու սովորել իւր պապերի քաջա-  
գործութիւնները, չհասկացած բանի համար հար-  
ցեր տուել, հետը վէճի բռնուել, թնդուել ինքը,  
թնդացրել հօրը:

Պատանի Իշխանիկը ոչ միայն տղամարդի  
պէս տեսօք էր, այլ և իւր պարթև հասակի հետ  
կտրուկ ու սրտուկ էր: Հօր կրթելու շնորքն էր  
այդ, որ տխուր ժամանակ՝ էլ ոչ ձիւն էր հարց-  
նում, ոչ անձրև, ոչ ցնւրա, ոչ տաք. թէ լոյս ա-  
րևով, թէ մութ գիշերով Իշխանիկին հետը ձի  
նստացրած շրջեցնում էր Թոռնեանի բոլոր մա-  
սերը, որ իւր սիրեկան որդուն անծանօթ չմնայ  
իւր աշխարհի ոչ թէ սարն ու ձորը, որ անագին  
բաներ են, այլ և ամեն մի առուն, ամեն մի քարը:

— Տես, սրդի, ճանաչիր աշխարհդ, որ ուր էլ  
գնաս, քո հողն ու ջուրը չմոռանաս: Ով ուզում  
է իւր աշխարհը սիրի, պէտք է նրան ճանաչի:

Այսպէս էր խրատում Ասիւծ Սաշիկը իւր  
կորիւնին:

Տարիներով Սաշիկի նետերը կրմնային կա-



պարճում թափուած, ~~պահանջ էլ անկողի ու ան-~~  
գործ, եթէ Իշխանիկը չլինէր, ~~հօրը կամեցէ՛ր~~ չընէր  
զէնքերը շարժելու, ժանգերը սրբելու,  
իւր հետ գրօսանքի կամ որսի գնալու, որպէս զի  
ինքը վարժուի զէնք ու սուր շարժելու:

Մենակ այդ չէ:

Իշխանիկը կորիւնների, թեթև արշաւանքների  
էլ մասնակցում էր, երբ թոռնեանցիք մղում էին  
հարևան քիւրդ ցեղերի դէմ: Ձի նստելում, սուր  
բանեցնելում նրա նմանը չափահասների մէջ չը-  
կար. եփուած տղամարդի պէս նրա աչքերը վարժ  
էին թէ թրաշողումին, թէ նետաշարժումին:

Թոռնեանի գորագունդը Հասանի և Ճնճղու-  
կի հետ Վասպուրահանից դուրս էր: Երկրում յոյն  
սահմանապահ գօրք կամ լինում էր կամ չէ: Թա-  
թարների և միւս նետողների արշաւանքների դէմ  
պաշտպանուելու համար գօրք էր հարկաւոր: Հայ  
գաւառներում մտածում էին կազմել, բայց խնա-  
մակալ կայսրը իրաւունք չէր տալիս, երկիւղ կը-  
րելով հայերի ապստամբութիւնից:

Սաշիկի հառաչելու և նենգաւոր յոյներին  
գանգատաւոր լինելու պատճառն հէնց այն էր,  
թէ ինչո՞ւ չեն թողում, որ իւր ժողովրդից նոր  
գօրագունդ կազմի երկրի ապահովութեան հա-  
մար: Ինքը մանկութիւնից կռուի, արիւնհեղու-  
թեան սովոր,— այժմ հարկադրուած է տարինե-  
րով լուիկ նստել: Ի՛նչ անենք որ ձերացած էր,  
բայց առիւծի նշանները դեռ չէին անհետացել:

Միբան առողջ և կռուի ծարաւ էր. միայն երբ որ իւր շուրջն աչք էր ածում ու մի հատ գինուոր չէր տեսնում, մնում էր տեղը կռթնած մոնչալիս:

Դ.

Սենեքերիմ թագաւորի հետ Սեբաստիա գաղթեցին բազմաթիւ հոգևորականներ. որը յօժարակամ, որն ակամայ: Բնիկ երկրում մնացող ժողովրդին մխիթարելու համար մնացին քիչ թուով երէցներ: Հոգևորականների մեծ մասը վանականներ էին, այն էլ վախից վանքերում փակուած: Այն հոգևորականները, որոնք գաղթականութեան հակառակն էին քարոզում, բոլորն էլ հալածուեցին անողոր կերպով:

Մխիթար երէցը ոչ միայն բանադրուեց Եղիշէ արքեպիսկոպոսից, այլ և շէնում ապրելու իրաւունք չունէր: Այդ կարգադրութիւնը յայտնուած էր յոյն կուսակախներին, որոնք հսկում և տեղեկութիւններ էին ժողովում Մխիթար երէցի մասին:

Այդ առաքինի քահանայի յանցանքն այն էր, որ իւր ճարտար լեզուով ժողովրդին համոզում էր իրանց երկիրը չթողնել, ուրիշին յոյս չկապել: Անդադար մի գաւառից միւս գաւառն էր շրջում գաւազանը ձեռին՝ մեծ մասամբ զիշերները, որ ապահով մնայ իրան հալածողներէից: Ժողովուրդը նրան ամեն տեղ ցնծութեամբ էր ըն-

դունում. հիւանդներին ամոքում էր, տառապեախներին մխիթարում, վախկոտներին հայրաբար յանդիմանում, խրախուսում:

Նա վաղուց զրկուել էր ընտանիքից. հալածաւէրների երեսից նրա կինն ու որդիքը արդէն փոխուել էին հանդերձեալ աշխարհը: Նա մի ընտանիք կորցնելով ամբողջ Վասպուրականի հայ ընտանիքների հայր էր դարձել: Ո՞ր կին նրան տեսնելիս իւր տունը չէր հշաւիրում, գլուխն ու ոտները լուանում, որ ճանապարհի փոշուց մաքրուի. սր պատանին կամ աղջիկը նրան տեսնելիս «Տէր հայր» չէր կանչում, ոտն ու ձեռը համբուրում:

Աստանգական կեանքով Մխիթար երէցը քրտան տարի անց էր կացրել: Քաշած զրկանքներն աչքը չէին գալիս. դո՞ն էր նա, որ իւր հօտը մըխիթարուած է իրանով: Նրա յորդորներով թաթարի ու պարսկի դէմ պաշտպանուելու համար, այս ու այն գաւառում յոյներէից ծածուկ խմբեր էին կազմել ոչ թէ երիտասարդները, այլ և հովիւ ու գառնարած աղջիկները:

Բայց ծերութիւնն իրանն անելով Տէր Մխիթարին զառամեցրել էր: Գլուխը հանգստացնելու համար նա մի խաղաղ անկիւն էր փընտրում: Այդ խաղաղ անկիւնը նրան սիրով առաջարկեց վըշտակոծ Սաչիկը, Արծրունի առիւծ իշխանը, որ նոյնպէս զառամել, դառն մտածմունքներով պաշտուել, մի սփոփողի էր կարօտ: Մխիթար ե-

րէցը իւր ուզած մարդն էր, որին նա սիրում ու պաշտում էր հոգու պէս:

Նրկունն էլ իրանց կեանքի մայր մուտին մօտեցած, հայրենիքի ազատութեան համար այնքան տառապանքներ կրած, միևնոյն սրբազան մտքերով տողորուած նստում էին Նկան բերդի աւագ աշտարակի առաջ, մի արևկող տեղ ու անցկացած դէպքերը փորփորում, յիշատակում:

Նրանց խօսակցութիւններին երբեմն ներկայ էին լինում բերդն եկող ժողովրդականք, բայց մշտական ունկնդիրը և խօսք ու զրոյցին մասնակցողը ծաղկահասակ, ուշիմ Իշխանիկն էր, որի գլխին Մխիթար երէցի ասելով, կապուած էր Վասպուրականի փառքը:

Մի անգամ Տէր Մխիթարը Սաշիկին պատմում էր.

— Ի՛շխան, քո կեանքը և արած քաջութիւնները զարմանալի են, բայց արդեօք գիտե՞ս թէ ուրիշ ի՞նչ զարմանալի իշխան է ունեցել մեր ազգը: Քո անունը Սաշիկ է, նրա անունը Վահան է եղել, քո մականունը Առիւծ է, նրա մականունը Գայլ է եղել: Բայց մի բանով նա առաւել էր:

— Ի՞նչով, տէր հայր, պատմիր լսեմ, հետաքրքրութիւնով հարցրեց Սաշիկը.

— Նրանով, իշխան, որ դու եօթանասունից մի երկու տարի անց՝ արդէն կոտորուել ես, բայց Գայլ Վահանը 88 տարեկան հասակում այնպէս առոյգ էր և եռանդոտ, որ երբ չար Միհրանը

պարսից Սոսրովի խօսքով եկել էր Տարօնը կործանելու, նա մի քանի հարիւր մարդով դուրս եկաւ 30.000-ի դէմ, թշնամիներէից 3000 հողի կոտորեց, Միհրանին էլ հետը. մնացածներին ցար ու ցրիւ անելով սար ու ձոր զցեց:

— Ա՛հ, տէրտէր ջան, ուրախ բացականչեց Իշխանիկը, ինչ կտրուկ մարդ է եղել այդ ծերունին: Ես այնպէս գիտէի, թէ մենակ իմ հայրն է քաջ ծերութեան ժամանակ: Սրտով կուզէի Գայլ Վահանը հիմի լինէր, ձեռը համբուրէի, որ նրա պէս շատ ծերանայի ու միշտ էլ քաջ մնայի: — Հայր, այն օրն ասում էիր թէ՛ Արծրունիներէից մխիթարական բան չկայ, հապա Գայլ Վահանն ի՞նչ է:

— Է՛, սիրուն Իշխանիկ, վրայ բերեց Մխիթար երէցը. դժուար է Արծրունիների մէջ Գայլ Վահան գտնել... Նա Արծրունի չէր. Մամիկոնեան ցեղից էր, որոնք մեծ ու փոքրով քաջ ու հաւատարիմ զաւակներ են հանդիսացել հայրենիքին: Իաւր մնան Տայոց աշխարհի սարերն ու ծմակները:

Նոյն ցեղից էր և Տիրանը, որ հագարացի Արզուրահամանի դէմ դուրս եկաւ 8000 զօրքով այնպիսի դժուար ժամանակ, երբ միւս հայ իշխանները զլուխները վտանգից ազատ պահելու համար ապահով անկիւն էին պարտում: Ոչ ով չէր ուզում զլուխը հանել թագստի տեղից, ինչ թէ օգնել, աջակցել:

Յանկարծ նրան ընկերանալ ցանկացաւ Մա-  
հուռը, Անձևացի մի փառասէր իշխան: Երանի  
չընկերանար և Վասպուրականի անուան կեղտ  
չբերէր: Պատերազմի բորբոք ու թունդ ժամա-  
նակ նենգամիտը անցկացաւ թշնամու կողմը...

—Ո՛հ, այդ ի՛նչ ասիր, տէր հայր, դառնու-  
թեամբ ընդհատեց նրան Իշխանիկը. եթէ մօտս  
լինէր, կորիւնութիւնս նրա վրայ կը փորձէի, որ  
իմանար թէ ի՛նչ է նշանակում ընկերին դաւա-  
ճանել:

—Է՛, միամիտ պատանի, չես իմանում թէ  
մրքան առաքինութիւն է հարկաւոր, որ մարդ  
հաւատարիմ, անդաւաճան մնայ դէպի իւր ըն-  
կերը, դէպի իւր հողն ու շուրճ: Հայաստանը  
այնքան տէր ու իշխող է ունեցել, որ մեր նա-  
խարարներն ու իշխանները ամենից ցանկանալով  
օգտուել, ամենին կամենալով հաճոյանալ, կամաց  
կամաց առաջ են բերել փոխոխամիտ և դաւա-  
ճան սերունդներ, մեր սիրուն աշխարհին անար-  
ժան ժառանգներ: Ո՞ր ազգի հետ ասես, որ մեր  
ազգը հաց չի կտրել և հետները նստել: Մի լաւ  
բանի հետ մի քանի պակասութիւն էլ ուրիշ է  
փոխ առել:

Վատասիրաների շարքում ունեցել ենք և ըն-  
տիրներ. օրինակ, դարձեալ Մամիկոնեան Մու-  
շեղի մասին ասում են, որ երեք հազարով երե-  
սուն հազարի դէմ դուրս եկաւ ու յաղթութիւնը  
տարաւ: Ուրախ սրտով պատերազմում մահ ըն-

Ընդհանրապէս չի տարբեր

դունեց, մի անգամ էլ ապացուցանելով որ մայր  
Հայաստանը ունի անխարդախ սիրով վառուած  
զաւակներ:

Հաւատուրաց Մեհրուժանին դարձեալ պատ-  
ժողը Մամիկոնեան Գաւթի բազուկը չէ՞ր, որ  
այդ գայթակղիչ Արծրունուն բունեց ու ոչխարի  
պէս խողխողեց:

—Ուխտյ, արտասուքն աչքերին վեր թռաւ  
Իշխանիկը, ի՛նչ լաւ բան է արել, տէր հայր, որ  
այդպէս պատժել է: Գաւթի թուրը առաջս լի-  
նէր, հարիւր անգամ կը համբուրէի: Ո՛հ, հայր,  
դարձաւ դէպի Խաչիկը, Արծրունիք ի՛նչ կարճա-  
միտ մարդիկ են եղել: Մեր իշխանների վատթար  
գործերից սիրտս բարձր ու ցածր է անում: Հէնց  
վերցնենք Գագիկ Արծրունուն, տէր հայր, այն  
օրը նրա մասին դու ասիր: Նա չէ՞ր որ Մմբատի  
պէս քաջ ու ընտիր թագաւորին գագան Յուսու-  
փի ճանկը զցեց ու նահատակել տուեց: Այդպէս  
չէ՞, տէր հայր:

—Այո՛, այդպէս է, պատասխանեց Տէր Մխի-  
թարը ու դառնալով Խաչիկին ասեց.

—Ի՛շխան, չի կարելի ասել, թէ մեր ազգը  
քաջարի, տոկուն զօրավարներ ու թագաւորներ  
ամենեկին չի ունեցել: Ընդհակառակը, ունեցել է,  
բայց այգում տնկած ընտիր պատուաստի պէս  
լափող որդերը կողքներին վխտալիս են եղել:  
Հէնց վերցնենք Աշոտ Նրկաթին, ճշմարիտ որ եր-  
կաթ, ափսոս ժանգերով է պատած եղել, որոնք

աշխատել, ձգնել են անդադար նրան մաշը գցել:

Երբ մի հայ իշխան առաքինի է եղել և աղի պէս քաղցր, իսկոյն նենդամիտները ծով են պատ-  
րաստել, որ նրան մէջը հալեն, հետքը կորցնեն:  
Եթէ գայլ է եղել, շներ են դարձել և վրան յար-  
ձակուել. եթէ առիւծ է եղել, իսկոյն ծածուկ ու-  
րողայթ են սարել ու մէջը բռնել:

— Ճիշտ է, տէր հայր, քո ասածին ես հա-  
կառակ չեմ: Մի բան էլ դեռ աւելացնում եմ, որ  
երբ հայ թագաւորն ու հայ իշխանները միաբան  
են եղել, երբէք մեր աշխարհը նեղ օր չի տեսել:  
Բայց երբ մէկը աջ է ձգել, միւսը ձախ, դրանից  
օգուտ են քաղել դրսի թշնամիները և սուտ բա-  
րեկամութիւնով մեր երկրին տիրել:

Յիշում եմ Կարսի Աբբաս թագաւորին և  
Գէորգ Մարգպետունի զօրավարին. ինչպէս յաղ-  
թեցին Աբխազաց գոռոզ թագաւորին: Իշխանիկի  
այս պատմութիւնը չի լսել, թող կարճ պատմեմ  
իմանայ: Աբխազ թագաւորը լսել էր, որ Կար-  
սում մեծ հոյակապ եկեղեցի են շինում: Սա պար-  
ծենում է, թէ պէտք է զնամ Կարսն առնեմ և  
եկեղեցին մեր հաւատի ծէսով օծել տամ: Բայց  
մոռացել էր մի բան, որ երբ հայ թագաւորն ու  
նախարար զօրավարը միաբան են, սարը չի դի-  
մանալ նրանց առաջ, ինչ թէ մի մեծամիտ թա-  
գաւոր: Աբխազաց թագաւորը պատերազմում գե-  
րուեց և կենդանի բերուեց Կարս: Աբբասը նրա  
կուռը բռնած տարաւ նորաշէն եկեղեցու բո-

լոր գեղեցկութիւնները ցոյց տուեց ու վերջը  
հարցրեց.

— Տեսա՞ր:

— Տեսայ, պատասխանեց Աբխազ թագաւորը:

— Այդ քեզ բաւական էր: Դէ, հանեցէք սրա  
աչքերը, հրամայեց դահիճներին Աբբասը:

— Ուն, ինչ կտրուկ մարդ է եղել Աբբասը,  
հաւանութիւն տուեց Իշխանիկը: Հապա այդպէս  
չէր կարող լինի Սենեքերիմը, հայր, որի անունը  
յիշելիս հառաչում ես ու վշտանում: Բայց մի  
կարգին չըպատմեցիր այդ ազգակից թագաւորի  
մասին, թէ ինչ է արել, որը յիշելիս գլխիդ ցա-  
ւը բռնում է:

— Դա սիրտ չունի, սիրելի Իշխանիկ, որ քեզ  
Արծրունեաց մասին պատմի, խօսեց Տէր Մխի-  
թարը, ես կասեմ աչքովս տեսածը, լսի՛ր: Ուղիղ  
որ Սենեքերիմը անշնորքի մէկն էր. փոխանակ  
թաթարների դէմ կռուելով իւր աշխարհը պաշտ-  
պանելու, սրտապատառ դիմեց յոյներին.

— Ես անկարող եմ իմ աշխարհը պահպանե-  
լու, ասեց, եթէ կը յօժարուէք թաթարների դէմ  
կռուելու, ահա տակիս եմ ձեզ ողջ աշխարհս,  
միայն աղաչում եմ մի հանդիստ անկիւն տուէք,  
որ ժողովրդիս հետ կեանքիս վերջին օրերը անց-  
կացնեմ ու խաղաղ մեռնեմ:

Ե.

Այս խօսքերի վրայ Խաչիկը խոր թառանչ



քաշեց. կրծքի տակը այբուում էր կարծես: Գթածակերից փնչալով ամպի պէս ծուխ ու մուխ հանելով վեր բարձրացրեց:

— Ե՞րբ, ի՞նչպէս պատահեց, տէր հայր, մանրամասն ասա, թախանձեց Իշխանիկը:

— Այդ պատահմունքը վաղուց չէ, քսան տարի հազիւ կայ: Այն ժամանակ դու ծնուած չէիր: Սենեքերիմ թագաւորը, որ վախկոտ ու ալարկոտ ծեր էր, վճռեց իւր աշխարհը տալ յոյներին և նրա տէրութեան մէջ հող վերցնել. այնտեղ փոխադրել իւր արքունիքը, զօրքն ու ժողովրդի մի մասը:

Այդ պայմանը կուելու համար իւր որդի Գաւթին Կ. Պօլիս ուղարկեց. նրա հետ չորս հարիւր ազնուականներ, հազար ձիաւոր, իւր երկրի Եղիշէ արքեպիսկոպոսը, երեք հարիւր շորու բեռն էլ ընծաներ: Վասիլ կայսրը ուրախութիւնով ընդունեց այդ ձեռնտու առաջարկը, և փոխանակութեան դաշնագիրը կնքեց:

1021 թ. դաշնագրի կնքելուց մի տարի ետը Սենեքերիմը իւր ընտանիքով, անթիւ իշխաններով, պաշտօնեաներով, տասնչորս հազար հեծելազօրքով, սրանց հետ մարդ, կին, մեծ, փոքր, մօտ հարիւր հազարի չափ ժողովուրդ թողին հին հայրենիքը, մեր անուշ հողն ու շուրը և դնացին օտար հողի վրայ նոր հայրենիք շինելու:

Դու փոքր ես, ի՞նչ կը հասկանաս, բայց անկարելի էր հայ ժողովրդին գաղթելիս տեսնել

ու լաց չլինել: Թողում էին իրանց դաշտերն ու լեռները, եկեղեցիներն ու սիրելիների գերեզմանները. յաւիտեան մնաս քարով էին ասում այն բոլորին, որ հայրենիք, նախնեաց երկիր էր կոչւում: Անտէր մնաց Ոստանայ արքունիքը, Աղթամարայ դղեակը, Վանայ բերդը, Վարազայ վանքը:

Սենեքերիմը իւր աշխարհի հետ յոյներին տուեց տասը շէն քաղաքներ, չորս հազար չորս հարիւր ընդարձակ դիւղեր, եօթանասուն բերդ:

Սենեքերիմը օտարութիւն դնաց և ողջ աշխարհը իւր ետեից կործանեց: Վասպուրականի ինչն էս հարցնում, սրդի, նա մի գոծար էր, բայց տխմար ձեռը գլորեց ծովի խորքը: Վերջը շատ էլ փնդռեն—գիւրին չէ գտնելը:

— Է՛հ, տէր հայր, երանի թէ մեր ազգի դժբաղդութիւնը դրանով վերջանար, վրայ բերեց ծերունի Խաչիկը, և վատանունը միայն Արծրունի թագաւորը լինէր: Բայց ո՞ւր թողենք Յովհաննէս Սմբատին, որ Շահնշահ մականունն էլ զուր չարակած ման էր ածում: Մեր ո՞ր թագաւորն է կարողացել յոյների ծուղակից ազատ մնալ, որ Յովհաննէսի պէս վախկոտը, ապաշնորհը մնար: Սենեքերիմից ետ երեք տարի էլ չանցաւ, Վասիլ կայսրը Հայաստանի ափով անցնելիս՝ Յովհաննէս թագաւորը Պետրոս կաթողիկոսին նրա առաջնուգարկեց թանկագին ընծաներով և գաղտնի կտակ շինել տուեց, որի մէջ խոստանում էր, թէ իւր մահից ետ Անի մայրաքաղաքը շրջակայքով պատ-

կանելու է յոյներին: Սրտապատառ թագաւորը այդ բանն անում էր նրա համար, որ Տուղրիլ բէկի յարձակմունքներից իւր երկիրն անփորձ և անվնաս պահի Վասիլ կայսեր միջոցով:

Իշխանիկը գլուխը բարձրացնելով հարցրեց.

— Հայր իմ, հապա մի ժամանակ ասում էիր, որ Վասակ սպարապետը հայ զօրքերով զարմանալի քաջութիւններ է արել ու ինքն էլ քաջի նման կռուի դաշտում մեռել: Այդ Յովհաննէս թագաւորի ժամանակը չէր:

— Ճշմարիտ է, սրբի, կռուել է մենակ սպարապետը առանց թագաւորի: Իսկ ես փոքր առաջ ասեցի, որ հայ աշխարհն ու զօրքը այն ժամանակն են անառիկ, երբ նախարարն ու թագաւորը միաբան են: Եթէ Վասակ սպարապետը Յովհաննէսի պէս վախկոտ թագաւոր չունենար, թաթարներին այնպէս նեղը կըլծէր, որ եկած ճանապարհները կըմուրէին:

— Եւ տուել է՞ Անի քաղաքը, հայր. անդամրձ է տուել:

— Տուել է, դաւակա, և միայն լոկ խօսքով չի տուել: Ինչպէս ասի, մեր կաթողիկոսի ձեռով է կնքուել դաշն ու կտակը: Բայց մեր աշխարհի վիճակը նրանից ետ ինքն իրան խաղաղուել է. Տուղրիլ բէկը և թաթարները մեր երկիրը ամենևին ոտք չեն դրել... յոյները մեզ մի մագաչափ երախտիք չեն արել այդ ժամանակ... բայց...

— Ի՞նչ «բայց», հայր իմ. մի ծածկիլ, մինչև վերջն ասա:

— Ի՞նչ ասեմ. եթէ Յովհաննէսը վախկոտի մէկն էր, Պետրոս կաթողիկոսն էլ պակաս փառասէրը չէր:

— Յետոյ ի՞նչ:

— Ի՞նչ ես ուզում, որ լինի, սրբի:

— Յետոյ ի՞նչ եղաւ, ասա, ինչո՞ւ ես լռում:

— Ի՞նչ ասեմ որ սիրտդ չցաւի: Ինչքան որ Մխիթար երէցը սիրելի է քեզ, այնքան էլ մի անպիտան կիրակոս երէց մեր աշխարհը պատուհասի մէկ պեց ու թողեց...

— Ի՞նչպէս, հայր իմ, մի երէցի ձեռով ի՞նչ պատուհաս կըգար:

— Այ թէ ինչպէս: Յունաց կոստանդին կայսրը, որ հոգուց մօտիկ մի խղճով մարդ էր, իմանալով որ հայերին խոստացուած օգնութիւնը չի հասել, անարգարութիւն համարեց Անին հայերից առնելը: Հոգևարք ժամանակ կանչեց կիրակոս քահանային. իբրև հոգևորականի հաւատաց ու յանձնեց Պետրոս կաթողիկոսի ձեռով կնքած կրտակը, որ բերի հայերին տայ: Բայց նա ազահութիւնից կուրացած այդ թողութը պահեց, մինչև բարեսիրտ կայսեր տեղ նստեց չարաննոց Միքայէլը: Տարաւ դրան տուեց և փոխարէնը ոսկիներ ստացաւ:

— Յետոյ, հայր իմ, սրտատրոփ հարցրեց Իշխանիկը:

—Յետոյ այն է, որ այդ թղթի գորութիւնով յոյները պահանջում են մեր գեղեցիկ Անին:

—Հիմի:

—Այո հիմի: Բայց հայերը չեն տալիս. դրանց գլխաւորն է Վահրամ Պահլաւունի սպարապետը, որ հոգեհանի պէս տանջում է յոյն գորքերին և չի թողում որ Անուն մօտենան: Անին փոքր, աննշան քաղաք չիմանաս, սրբի. նա մեծաշէն, բաղմազանձ, մարդաշատ բան է, հազար ու մի եկեղեցի ունի: Վատասիրտ Միքայէլը ատամները սրել է աննման Անին խլելու համար. հայերը չեն տալիս:

—Եւ շատ էլ լաւ են անում, հայր, ինչո՞ւ տան, վրայ բերեց Իշխանիկը:

—Ասում են, ձեր թագաւորը խոստացել է:

—Սխալում են այդպէս ասելով: Թագաւորն ինչ իրաւունք ունէր մէկին բախշելու այն, ինչ որ իրանը չէր: Անին ազգինն է, թագաւորինը չէ: Թագաւորը խոստացել է ու մեռել, թող դրանան նրանցից պահանջեն:

—Քու խելքին որ լսեն, լաւ կըլինի, բայց չեն անում: Տեսնելով որ հայերը առանց իրանց կամքը հարցնելու ժողովուեցին ու Անու մէջ Աշոտի որդի Գագիկին թագաւոր ընտրեցին, յոյները զայրացել, կատաղել են: Հարիւր հազարներով նրանք գորքեր են ուղարկել, որ պաշարեն, և ուժով առնեն Անին: Բայց դէ, կարելի բան է, որ նախարարն ու թագաւորը միաբան եղած ժա-

մանակ հային կարողանան յաղթել կամ մէջքը ծռել:

Յոյները յարձակուելով միշտ ջարդուել են հայերից և փոշմանած ետ դարձել: Վերջը խորամանկ միջոցներով որսացել են վեստ Սարգսին, անթիւ գորք տուել նրա ձեռը, որ Շիրակ մտնի և Անին առնի:

Վեստ Սարգիսը Աշոտի ժամանակ արքայական գանձերի հոգաբարձու էր: Նրա արարմունքը Վահրամին վիշտ ու մտածմունք էր սլատճառել: Արծուի նման քիթը քաշ էր արել երկրի ծանր վիճակի վրայ մտածում:

Այդ ժամանակ անվախ, ազատասէր հայերը ժողովուել են ծերունի Վահրամի շուրջը և միաբերան խնդրել:

—Հայր Վահրամ, վերկաց և մեզ պատերազմ տար: Կամ մեզ մեր թագաւորաշէն պարիսպների տակ մեռցրու կամ վեստ իշխանին մեր աչքի առաջ սասկացրու: Մենք բաց աչքով Անին յոյներին տուողը չենք:

Ծերունի զօրապետն այս խօսքերով ոգևորուած անցել է քաշերի գլուխը և վեստ Սարգսի վրայ յարձակուելով այնպիսի կոտորած է տուել յոյներին, որ կացնի բերանից թռած տաշեղների պէս փախել ցրուել են Ախուրեանի ձորերն ու ծերպերը: Մի մասը սրից է ջարդուել, միւս մասից շատը ջրում խեղդուել: Յոյները հայ գորքի անարկու աղաղակներից այնպէս են ապուշ կտրու-

ել, յիմարացել, որ ճարահատեալ աղերսել են հայերին, մի քիչ գուլթ ունենան, ամենին սրի բերան չըտան: Վահրամը հրամայել է իւր զօրականներին մեղմացնել ջարդը: Գրանով ազատուել են հարիւրի չափ յոյն զինուորներ և փախել իրանց աշխարհը:

Եթէ Վահրամը ծերունի տեղով այդպէս կոտորածներ անէր, ինչ կըլինէր քաջ պատանի թագաւորը, որ տղամարդու ամեն արժանաւորութիւններն ունի. մի գեղեցիկ, բարեպաշտ, վեհանձն, զօրեղ, զգաստ, առաքինի անձն է: Դեռ հերու էր, որ արիասիրտ մարդկանց գլուխն անցնելով յարձակուել էր ուխտադրուժ Սարգսի վրայ, կալանաւորել Անու մէջ, որ դադարի յոյներին գործակից լինելուց:

Յոյներին ջարդելուց վերջը լսել էր, որ թաթարներն անհամար բազմութիւնով լցուել են Նիզ գաւառը և կամենում են Գրիգոր մագիստրոսին Բջնի բերդում պաշարել: Գագիկը շանթի պէս հասել է Հրազդանի մօտ, առաջները կտրել, իրար գլխի ածելով ոտնատակել, ցաք ու ցրիւ տուել և մեծ աւարով դարձել Անի մայրաքաղաքը:

Պատանի թագաւորի քաջագործութիւններից Իշխանիկի հոգին ցնծում էր: Գարձաւ հօրն ուրախազէմ հարցրեց.

— Հայր, այդ թագաւորը մխիթարուած կը մնա՞յ իշխանների կողմից, թէ ուրիշ Սահուռներ, Վեստեր դուրս կը գան, որ դաւաճանեն նրան ու

ու վերջը թշնամիները բերանում թողնեն:

— Այն կողմից եկողները հաստատ ոչինչ չեն ասում, բայց թւում է որ մի քանի փառամոլ ու թանձրամիտ իշխաններ չեն դիմանալու. յոյների նենգաւոր խոստումներից խաբուելու են:

— Մէհ, այդ ինչ ես ասում, հայր, շանթահարուածի պէս գոչեց Իշխանիկը: Ուրեմն Գագիկին կը գլորե՞ն... փոխանակ սիրելու, օգնելու, որ վախկոտ Յովհաննէսի կորցրածը ետ է խլում: Վայ, վայ, վայ...: Ո՞ւր էր թէ մինն էլ լինէր, տխմար Սենեքերիմի կորցրածը ետ առնէր... Զէ՞ որ, դու մի անգամ ասիր, թէ շնորհալի թագաւորներին ազգն է ընտրում. Գագիկն էլ դրանցից մինն է: Ո՞վքեր են այն վատ հոգիքը, որ ազգի ընտրեալի վրայ խէթ աչքով են նայում...: Այդպիսիներին բնաջինջ անելու համար մենակ ես բաւական եմ:

Խաչիկը անհուն գորովով որդուն մօտ քաշելով սիրուն գլուխը գրկեց, երեսն ու ճակատը համբուրեց: Աչքերից արտասոււնք թափելով՝ հետն էլ մեղմ շնջաց.

— Հասակի՞դ ու արևի՞դ մեռնի Խուլ Խաչիկը: Ի՞նչ կը լինէր, Աստուած կեսնքիս մնացած օրերը խէր, քեզ բաշխէր. դու մեծանայիր, սրտիդ փափազները տեղաց անէիր. այ իմ քաջ կորիւն, այ իմ փուլած սրտի սիւն:



2.

Մխիթար երէցը Իշխանիկով հիացած էր: Տեսնելով նրա հետաքրքրութիւնը՝ ժամերով մօտը նստեցնում, ասում-խօսում էր: Խաչիկի թողած պակասորդը նա էր լրացնում: Իշխանիկը մինչև անգամ գրածանանչ էր դարձել Տէր Մխիթարի մօտ գնալ գալուց. երբեմն մագաղաթի կտորները աչքին բռնում էր ու հեգելով կամաց կամաց կարդում:

Մի անգամ Մխիթար երէցը Իշխանիկի աներկիւղութեան ու խելօք զրոյցների վրայ զարմանալով մօտ կանչեց, ճակատը համբուրեց ու ասեց.

— Երանի՛ քեզ պէս մի քանիսը ունենար վասպուրականը:

Յետոյ հառաչելով աւելացրեց.

— Ո՛հ, որքան սակաւ են այժմ ազատասէր հոգիներ մեր աշխարհում: Յոգնեցի բարոզելուց, իմ սրտի ուզած անվախ, անահ աղջիկ ու տղայ չը գտայ, ամենն էլ սրտամեռ, վախլուկ են դարձել: Երկու հոգի միայն կան Հայկ նահապետի արժանաւոր զաւակներ, մինը տղայ, միւսն աղջիկ: Նրանք էլ դեռ փոքր են:

— Տէր հայր, ժպտալով խօսեց Իշխանիկը, ես ճանաչում եմ ում որ ասում ես: Տղի անունը չեմ ասիլ, բայց աղջիկը Բիւրեղիկն է: Ի՛նձ ես գովում թէ քաջ եմ: Ես ի՛նչ եմ նրա մօտ: Տեսել ե՞ս, տէր հայր, երբ գառնարած աղջկերանց

հետ միասին կռիւ է դուրս գալիս քիւրդ հովիւների դէմ: Նրան պէտք է տեսնել մահակը ձեռին ծվալիս, նրանց վրայ յարձակուելիս, որ զարմանաս: Թէպէտ մեր հովուի աղջիկն է, բայց քսան իշխանունի արժի: Նա սրտեղից է լսել մեր աշխարհի հին-հին բաները, որ ընկեր աղջիկներին էլ աղբիւրների գլխին նստած ժամանակ պատմում է:

— Ապրի Բիւրեղիկս, խօսեց Տէր Մխիթարը, շատ լաւ է անում: Հապա, ես նրան սովրեցրել եմ, որ նա էլ ուրիշներին պատմի:

— Տէր հայր, գիտե՞ս ինչ: Մի օր գնացել էի դաշտը մեր ոչխարներին նայելու: Դեռ հեռու էի, Բիւրեղիկին նկատեցի. տրեխները ոտին, մահակը կռան տակ, կանաչ թմբի վրայ կանգնած մի բան էր գործում: Տէր հայր, քեզ ուղիղ խոստովանեմ, այդ աղջիկն ինձ վաղուց դուր է գալիս. համ սիրուն է, համ սրտոտ: Սիւտակ քուռակս քշելով հասայ նրա թմբին ու հարցրի կատակով.

— Ի՞նչ ես գործում, Բիւրեղիկ, ո՞վ գիտէ պաճիճ ես գործում նշանածիդ համար:

Բիւրեղիկը քիչ կարմրեց ու համարձակ պատասխանեց հեգնական կերպով.

— Հիմիկուան տղեքը իրանց հարսնացուներից պաճիճ ու հէսիլի կը պահանջեն, որ զարդարուեն ու նախշուն ոտներով զուարճանան, բաս հօ ուրիշ աւելի հարկաւոր բանի վրայ չէն մտածիլ: Նրանց շատ հոգն է, որ մտածեն, թէ մեր

աշխարհը թաթարների, արաբների ձեռից ինչ  
րի մէջ է: Արդեօք տղաների քունը ինչպէս  
տանում, որ մտածում են թէ իրանց աշխար  
յոյների ձեռին գրաւ է:

Մօտենալով նայում եմ, տեսնում—ինչ. Բիւ  
րեղիկը ոչ թէ պաճիճ է գործում, այլ պարսու  
տէր հայր, պարսուտ: Զարմանալով հարցնում եմ

—Ինչի համար է, ո՞վ պէտք է գործ ած  
այդ:

Նա պատասխանում է.

—Զարմանալի է այժմեան աղերանց խելք  
սնց թէ ինչո՞ւ համար է: Պարսուտ է, մեր պե  
պերի զէնքերից մինը, չես հասկանա՞ւ: Շինու  
եմ, որ քիւրդ հովիւների զէմ գործ ածեմ: Նես  
հատած միջոցին պարսուտը տղամարդկանց հա  
մար էլ լաւ զէնք է: Բայց որովհետեւ մեր ա  
խարհի շփոթ ժամանակն է, ամեն կողմից յալ  
ձակում են՝ թաթար, արաբ, յոյն. ամօթ չ  
աղջկերանց էլ պարսուտ բանացնել ու նրան  
աներես թշնամիներին հալածել: Տղայ չեղած տե  
ղը ես աղջիկ տեղովս մի տղայ արժեմ, վրայ բե  
րեց Բիւրեղիկը կարմրելով:

—Տէ՛ր հայր, մեղքս ինչ ծածկեմ, այդ հա  
մարձակ ու խելօք խօսքերը լսելուց ետ չհամբե  
րեցի, իջայ ձիուց և Բիւրեղիկին սրտանց հա  
բուրեցի: Թէպէտ մեր ոչխարածի գոլատրն է, բայ  
անչափ մեծասիրտն է. եթէ սկզբից միտքս իմա  
նար, չէր թողիլ որ մօտենամ: Կատակով ասի.

—Բիւրեղիկ, քեզ պէտք է ուզեմ:

Հովուի աղջիկը փոխանակ ուրախութիւնից  
վեր թռչելու և ոտներովս փաթաթուելու, իսկի  
նշանակութիւն էլ չը տուեց, թէ իւր տէր—իշ  
խանի որդին եմ. հպարտ ու սիրուն պինչը վեր  
բաշելով խօսեց:

—Հասանի ու ձնճղուկի պէս մի ապերախան  
էլ դու պէտք է դուրս գաս վերջը. մեր աշխար  
հը թողած գնաց ուրիշին ծառայես: Մեր աշ  
խարհի ջուրը քիչ համարելով գնում էք ուրիշ  
մեծ ծովում լող սովորելու, բայց չէք իմանում  
որ տակը պէտք է անէք ու կորչէք անհետ:

Շատ երգուեցի, որ հօրիցս հեռացողը չեմ.  
նա չհաւատաց:

Հեռանալիս ուզեցի մէկ էլ համբուրեմ, յան  
կարծ խաղաղ Բիւրեղիկը բարկութիւնից կարծես  
կրակ կտրած, հերսոտ աչքերով նայեց վրէս ու  
ասեց:

—Իշխանիկ, դեռ գնա տղամարդութիւնդ  
ցոյց տուր, մի մեծ կուռի մէջ իշխանական ա  
նունդ բարձրացրու, յետոյ արի աղջիկ համբու  
րիր: Գեռ իշխանիկ ես, մի համբոյրն էլ քեզ բա  
ւական է. Աստուծով երբ իշխան կրդառնաս,  
ինձնից լաւ շատ հարսնացու կը ճարես: Երեխայ  
ես, չես իմանում, որ զոյգ համբոյրը նշանի գը  
րան է.

—Կեցցէ՛ Բիւրեղիկը, բացականչեց Տէր  
Մխիթարը, շատ ճիշտ է ասել, ձեզ պէս յամառ

կորիւններին Բիւրեղիկի պէս աղջիկներ պէտք է պատահեն, որ ամաչեցնեն, խելքի բերեն: Շատ ուղիղ է նկատել, քո եղբայրները ի՞նչ են գտել օտարութեան մէջ, որ վատ մուրացկանի պէս էլ իրանց սեպհական տունը չեն մտաբերում: Մեր աշխարհի օդի ու ջրի պէս քաղցր, հողի ու երկնքի պէս անուշ, ծաղկի ու աղջկայ պէս գեղեցիկ ո՞ր աշխարհն ունի... բայց չէ՛, փառք մուրալը արիւն ու միս դարձած հայ շինականին էլ, իշխանին էլ քշում է դէպի պանդխտութիւն, դէպի սնաքանդութիւն:

Տէր Մխիթարի այս յանդիմանախառն խօսքերը աւելի ու աւելի էին բորբոքում Իշխանիկի սիրտը. նա գիշեր-ցերեկ պատերազմական յաղթութիւնների վրայ էր երազում ու մտածում:

Երբ հայրը մի անգամ հայրենիքի ամեն ցաւ ու կսկիծ սիրտն արած, Նկան բերդում նստած վրչում էր ու ծերութեան վրայ դժգոհում, Իշխանիկը սանձակոծ մտրուկի պէս փարթամ մագերը թոթուելով եկաւ նրս առաջ ծունկ չորեց և ասեց:

— Հայր իմ, ինչո՞ւ ես հառաչում, չէ՞ որ այժմ այլ ևս փոքր չեմ: Հասանի ու Ճնճղուկի պէս կարող եմ պատերազմում աջ թևդ պահել: Ասում են մեր Թոռնեանի սահմանների վրայ թաթարներ են երևում: Տեսնողները պատմում են, որ նրանք շատ չեն. իրաւունք տուր մի խումբ երիտասարդներ վերցնեմ, նրանց վրայ յարձա-

կուեմ: Տես յաղթող կը դառնամ թէ ոչ:

— Ո՛հ, Իշխանիկա, մի՛թէ կասկածում էլ ես, որ պատերազմից յաղթող կը վերադառնաս: Ամօթ չէ՞ կորիւնին՝ պատերազմ մտնի և պարտուած դուրս գայ: Դու լսել ես, որ երբ և իցէ քո հայր Խաչիկը առանց յաղթանակի Նկան վերադառնայ: Ո՛հ, գաւաղս, սուիւծի վրայ այդպէս մտածելը մեղք է:

Յետոյ սիրտը շահելու համար աւելացրեց:

— Միայն դու դեռ փոքր ես, համբերիր, Առիւծ դառնաս, յետոյ...

Իշխանը դեռ խօսքը չվերջացրած լոեց ու մտածմունքի ծովն ընկաւ:

### Է.

Այդ միջոցներին լուր էր տարածուել, որ Միքայէլ կայսրը վախճանուել է:

Յոյն կուսակալը հեռացել էր. Վասպուրականը թափուր էր մնացել թէ կառավարչից և թէ զօրքից: Թաթարները խումբ-խումբ ներս էին խուժում, դաշաբերից ոչխար, արջառ քշում, տանում: Ժողովուրդը հարստահարւում էր օրէցօր:

Այդ խմբերի մասին էր լսել քաջ Իշխանիկը, որոնք Վասպուրականի ամեն անկիւն կողոպտում, ապականում էին, բայց Թոռնեանին մօտենալ, Առիւծ Խաչիկի թարթափն ընկնել— երբէք չէին համարձակւում:

Անտէր մնացած հայ գաւառների աւարի, կո-

դոպուտի համը դրանց ատամի տակն էր մնացել: Գայլազուաների պէս Հայաստանի գլխով պտտե-  
լիս աչքները տնկել էին Այրարատի վրայ: Այնտեղ  
թագաւորում էր երիտասարդ Գագիկը. այդ գի-  
տէին թաթարները, բայց մարդահաշիւ չէին գցում  
նրան: Անհամար բազմութիւնով ատամները սրած  
թափուէլ էին Այրարատ աւերելու: Խոհական քաջ  
Գագիկը յանկարծակի նրանց դէմ դուրս գալով  
բերաններին այնպէս էր խփել, որ ջարդուած, խայ-  
տառակուած հազիւ էին կարողացել շունչները  
վրէն փախչել ու պրծնել:

Յաղթուած թաթարները գազազած, կատա-  
ղած, Գագիկի առաջից հալածուած՝ փախել էին  
Կորդուաց աշխարհի կողմերը, որ թալանեն, կրա-  
կի բերան տան ամեն բան, ինչ որ հայինն է.

Այդպէս էլ արին: Որքան ոյժ ունէին ան-  
գթութիւններ, սրածուծիւններ անելու, չէին  
խնայում: Բայց զրեթէ ամեն զիւղում, ամեն գա-  
ւառում հանգիւյում էին խիստ զիմադրութեան  
հայ ժողովրդի կողմից: Կանայք ու աղջկէրք ան-  
գամ անվեհեր կռոււմ էին իրանց ազգակիանների  
հետ և հարուածների տակ շունչները փչում:

Այդ տեսնելով թաթարները նոր ընկերներ  
ժողովեցին, բոլոր գաւառները ոտնատակ տուին:  
Գիտէին որ յոյն կուսակալը գնացել է, չկայ. Հա-  
սանն ու Ճնճղուկն էլ դեռ Կ. Պոլսից Վասպու-  
րական չեն եկել. մտադրուեցին աւելի առաջ  
գնալ:

Եւ գնացին:

Հասել էին արդէն Թոռնեանի զիւղերին. առ-  
ժամ կանգ առան սարսափած: Առիւծ Խաչիկի  
գարհուրելի անուռն էր հնչում ամենի բերանից:  
Թաթարներից ոմանք ասում էին.

— Երկրում զօրք չի երևում, մտնենք Թոռ-  
նեանն էլ կողոպտենք, առատ աւարն այստեղ է:  
Ոմանք էլ ահ ու դողով պատասխանում էին.

— Ո՞ւր էք գնում, յիմարներ, սրան Առիւծ  
Խաչիկի որջ կասեն, քարի միջից էլ զօրք ու զի-  
նուոր դուրս կը թափուեն, եթէ Խուլ Խաչիկը  
սև ձիու վրայ ձեր առաջը դուրս գայ:

— Է՛հ, աւելորդ է մի մարդուց վախենալը,  
կրկնում էին իրար ետնից թաթարները, մանա-  
ւանդ որ ծերացել, ուժից ընկել է.

— Գագիկին պատանի ասելով մարդատեղ չը  
դրինք, գնացինք ու ջարդուեցինք, հիմի էլ Խա-  
չիկին ծեր ասելով ուզում էք երկիրը մտնել: Ձէ,  
մենք համաձայն չենք, պնդում էին թաթարների  
մի մասը. թող իմանանք, գոնէ, թէ այժմ ո՞ւր է  
Խաչիկ իշխանը: Դուք յոյս մի դնէք նրա ծերու-  
թեան վրայ, առիւծն ինչքան ծերացած լինի,  
գարձեալ մոնչալ ու ձէտով շրմփացնել գիտէ:

Այս վերջին խօսողները իրանց միջից ձիա-  
ւոր ուղարկեցին Թոռնեան, որ լրտեսի: Ձիաւորը  
վերադարձաւ. նրա բերած տեղեկութեան վրայ  
մի վայրկեան էլ կանգ չառան թաթարները. բո-



լորն իրար ետնից հեղեզի պէս թափուեցին թոռնեանի սահմանի գիւղերի վրայ:

Չիաւորը լուր էր բերել, որ խուլ Սաշիկը իւր երկրից բացակայ է:

Բայց ուր էր առիւծը, որ իւր որջումը չէր:

**Ը.**

Միքայէլ կայսեր մահը Սաշիկը լսելով ուրախանալու պէս եղաւ. կասես մէկը նրա ականջըն ի վեր ասելիս լինէր.

— Որդիքդ որտեղ որ է, կը գան:

Այդ յուսով ծերունին վրայ եկել, առուզացել էր: Այս ու այն գաւառի աւերածի մասին լսելիս արիւնը հերսից, բարկութիւնից եռ էր գալիս սրտի մէջ: Մղած պատերազմները վերանորոգում էին աչքերի առաջ, ուր հազարաւոր թաթարներ ու այլազգիներ արիւնթաթախ, ճապողած թափուած էին լինում: Սպիների տեղերը քոր էին գալիս, կուրծք ու երակ նրան կռուի էին կանչում, յորդորում:

Ծերունի դիւցազը առժամ թողել էր Իշխանիկին Նկան բերդում, Մխիթար երէցի հետ ձի նստած գնացել էր Ճուաշ. յետոյ այնտեղից դէպի Նախջուանայ կողմը՝ մնացեալ հայ իշխաններին խորհուրդ ու խրատներ տալու, որ միաբանուեն: Հէնց այդտեղ էր, որ Սաշիկին լուր տուին, թէ թաթարները թոռնեանի մէջն են: Առիւծը, որ երբէք չէր վհատած վտանգների ու յարձակում-

ների մասին լսելիս, այժմ դառնութեամբ անքաշեց.

— Թոռնեանին էլ հասան թաթարները, ուրեմն այլ ևս Սաշիկի անունը նրանց չի սարսափեցնում: Ծերութիւն, ծերութիւն: Բայց ուր էք, դուք, կարիչ որդիներս, գուցէ ձեր երիտասարդութիւնից պատկառեն թշնամիները և թոռնեանը հանգիստ թողնեն: Բաւական չեղաւ պանդխտութիւն քաշելը: Չեր բացակայութիւնից և իմ ծերութիւնից օգուտ քաղելով այլազգիք խուժել են հայրենի հողը, ուր էք Հասան, Ծնճղո՛ւկ:

Այս հառաչանքը Կ. Պոլսում նրանց ականջն էլ ընկնէր, ինչ օգուտ: Մինչև նրանց հասնելը աշխարհը ձեռից կը գնար:

Այդ լաւ դիտէր Սաշիկը, առանց ժամանակ կորցնելու Մխիթար երէցի հետ սրարշաւ հասաւ Նկան: Այդ վտանգը հեռացնելը իւր վերջին քաջութեան և պարտականութեան գործ համարելով, խնդրեց Տէր Մխիթարին, որ Իշխանիկի վրայ հսկի.

— Նայիր, տէր հայր, որ բերդի պարսպից ոտը դուրս չդնի, թէ չէ նրան սանձել անկարելի է: Մեծ պատերազմ չի մտած, որ խոհեմ շարժուել կարենայ. եռանդն անհուն է և ինքն անփորձ. պատերազմի գոչիւն լսելիս խենթ մտրուկի պէս, առանց վտանգը կշռելու արիւնալից աչքերով գոռ տեղն է վազում: Աղաչում եմ, հսկիր: Եթէ ես պատերազմից ողջ չեմ վերադառնալ, այն

ժամանակ ամուր է իմ Նկան բերդը, որքան կարող էք ժողովուրդ ներս առէք ու պաշտպանուեցէք Իշխանիկիս հետ:

Կանչեց Իշխանիկին և յուզուած ձայնով խօսեց.

— Սիրասուն գաւակս, այսօր և վաղը իմ տեղքո մեծաւորը կըլինի Մխիթար երէցը. քեզ նրան եմ յանձնում, քաջ իմանալով որ նրան սիրում ես: Ինչ էլ որ ասի, պէտք է լսես: Միշոց չկայ այս ըոպէիս ամեն ինչ մանրամասն քեզ բացատրելու, անի, ճակատդ համբուրեմ ու մնան բարով:

Իշխանիկը իւր հօրը երկար տարիներ այդ պէս վրդովուած ու կտրուկ խօսելիս չէր տեսել: Սրտով ուզում էր խնդրել, որ իրան էլ հետը պատերազմ տանի, բայց վախեցաւ այդ դայրացած վայրկենին մերժումն ստանայ եթէ դիմի. հօր աջը համբուրեց լուիկ ու սիրարթնած և արտասուելով քաշուեց աշտարակը:

Տէր Մխիթարը հետևեց նրան:

Իրիկնապահն էր:

Խաչիկն առանց ըոպէ կորցնելու իւր անեղ ձայնով բերդից իմացում տուեց ժողովրդին.

— Հապա թոռնեանցիք, ո՞վ է պատրաստ ինձ հետևելու. սուր, նիզակ. թռէք, հասէք:

Ուրբեր հեռու էին, ձայնը չէին լսիլ, ծառաներ գնացին նրանց ետևից:

Շտապեց Խաչիկը, երկայնատէգ նիզակը, որ վաղուց միւս գէնքերի հետ պարապ էր, սձորքից

հանեց, պղնձապատ վահանին չրխկացրեց: Վահանի ցնծազին հնչիւնը խուլ խաչիկի սիրան ու հողին եռ բերեց: Ճերմակ մազերը սաղաւարտի տակ ժողովեց, հեծաւ սևաթոյր ձին ու սուրը ձեռին առաջ սրացաւ իւր թոռնեանցի փոքրիկ զօրագնդի հետ, որ ընդամենը եօթանասուն հոգուց էր բաղկացած:

Թ.

Առաւօտահովն էր, Նկանայ արևելեան մեծ դուռը արագ-արագ բաղխեցին: Պահապանը մինչև հարց կըտար թէ ո՞վ ես, դրսից մի սուր ձայն ճչաց.

— Ի՞նչ ես ոչխարի պէս ապուշ կտրուել, Ամբակ:

Այս յանդիմանութեան վրայ Ամբակ դռնապանը իմացաւ թէ ո՞վ է և ի՞նչ սրտի տէր. իսկոյն բաց արեց:

Մանողն աղջիկ էր, բիւրեղի պէս սիրուն, շողշողուն, մազախն ուսից կախ, կլոր քարերը մէջը լիք, պարսուտը թևով փաթաթած, մահակը կռան տակ, փարթամ ծամերը վզի երկու կողմ ծածան ծածան: Առանց իրաւունք հարցնելու դիմեց ուղղակի աշտարակը, ուր նստած էին Մխիթար երէցն ու Իշխանիկը:

Գողարիկ սիրուն հայեացքը սփարթնած էր: Բերանը բանալով այսպէս խօսեց.

— Տէր հայր, ո՞ւր ես պարապ նստել, չէ՞ որ

Թաթարները մեր գաւառն էլ մտան: Ես երէկ դաշտումն էի, որ իշխան Սաչիկի ծղրտոցն իմացայ. ասում են մի քանի մարդով Թաթարների դէմ կռիւ է գնացել: Հապա, միւս իշխաններն ո՞ւր են, միթէ նրանք չէ՞ն մասնակցելու: Ի՞նչ ենք տեսնում, Աստուած, միթէ բացի Սաչիկից իշխան ունենալու չենք և նրա մահից ետ ո՞րք պէտք է մնայ մեր աշխարհը: Տէր հայր, գոնէ դուք գնացէք ժողովրդին առաջնորդեցէք, որոնք շուարուել են, մնացել: Ա՛խ, ո՞ւր էք Հասան, Ճնճղոճկ, Թոռնեանի օդը նրա համար ծծեցիք, որ նեղ օրը նրան թողնէք, ուրիշին ծառայէք. չէ՞ որ մեր երկրի աչքը դուք էիք: Մի օր պէտք է պարծենա՞ք թէ առիւծ Սաչիկի որդիքն էք: Ա՛խ, ո՞ւր էր թէ ես լինէի Սաչիկի կորիւնը. կուրծքը ծեծելով մորմուքում էր սիրուն աղջիկը, այն ժամանակ ցոյց կը տայի, թէ ի՞նչ է նշանակում թշնամուն շամփրած պահելը: Ի՞նչ արած, սրանց պէսներն են իշխանագունները (ձեռը մեկնեց դէպի այն կողմը, ուր տեսել էր իշխանիկին կարգնած), որոնք հայրենիքի նեղ օրերին օգնութիւն հասնելու փոխանակ, որը պանդխտութիւն է գընացել օտարի դռներին թափառելու, որն այստեղ կռները խաչած լալկան երեխայ է դարձել, մընացել:

Ամօթ այդպէս երիտասարդներին:

Հովիւ ու գառնարած աղջիկներս արգէն խումբ կազմած մեր արօտներն ենք պահպանում,

գառները թաթարների ձեռից խլում, իրանց քարէ կարկուտով ետ ածում. մեր երիտասարդ իշխանները այս ու այն անկիւնը քաշուած իրանց գլխին են միայն օրոն անում: Վայ քեզ մեր խեղճ աշխարհ...

Իշխանիկը Բիւրեղիկի վերջին խօսքերը չըլսեց: Նա վաղուց աշտարակից դուրս էր փախել աննկատելի կերպով: Ձէնք ու նշանները կապած, զրահը հագած, հէնց ուզում էր ձիու գլուխը դէպի բերդի դուռն ուղղել, Մխիթար երէցը դուրս վազեց առաջը և պաղատաձայն խօսեց.

— Իշխանիկ, գլխովդ ման տամ, մեղք արի այս ճերմակ մազերիս: Հայրդ լալով խնդրել է ու քեզ ինձ պահ տուել. մի՛ գնալ, իշխր այդ ձիուց: Հօրդ պատուէրը մի կոտորիլ, սպասիլ դէթ այսօր մինչև լուր գայ: Հասանի ու Ճնճղոճկի պէս անուշակալ գաւակ մի լինիլ:

Բայց պատանին վահանով, և տոհմական բոլոր նշաններով սպառազինուած յամառելով պատասխանեց.

— Ո՛չ, տէ՛ր հայր, չեմ իջնիլ. քեզ պէս ճերմակ մազեր իմ հայրն էլ ունի, սը այժմ պատերազմումն է, հասկա նրան ո՞վ մեղք գայ և ո՞վ օգնի, եթէ ես իջնեմ: Ձէ՞ որ նա, իմ ծերունի հայրս միայնակ է այժմ պատերազմի դաշտում և թշնամիներով շրջապատած՝ յուսահատ վիճակում «կտրիճներ, կորիւններ» է կանչում: Հասուն կրտրիճները հեռու աշխարհում են, նրանք չգիտեն

իրանց հօր նեղ դրութիւնը, վաղեն գան, հապա-  
 ես, տէ՛ր հայր, նրա կորիւնը չե՛մ. ինձ նա՛ չէ մե-  
 ծացրել իւր բազուկների վրայ: Հապա ես Առիւծ  
 Խաչիկի Իշխանիկը չե՛մ... Եթէ ես էլ նրան միայ-  
 նակ թողնեմ արեան դաշտի մէջ ու հանգիստ  
 նստեմ. լսողն ի՞նչ կասի: Չէ՞ որ Թոռնեանցոց  
 ազատութեան յոյսը ես եմ, տէ՛ր հայր: Կռուի  
 ժամանակ ինչո՞ւ էք կորիւնի օտն ու ձեռք կապ-  
 կապում: Միթէ՞ հայրս չէ ինձ սուր ու նետ վար-  
 ժեցրել, ինչո՞ւ պէտք է ինձ արգելէր այդ գոր-  
 ծածել: Չէ՞ որ նա այս բոպէիս այդ արգելած  
 բանով է զբաղուած: Աղաչում եմ, տէ՛ր հայր, մի  
 արգելի, թո՛ղ բերդից ելնեմ, հօրս հասնեմ, թէ  
 չէ մահն աչքիս տակն ունեմ, աշտարակից ինձ  
 կը գցեմ դէպի կողքի անդունդը:

Այս ասելն էր, որ Իշխանիկը իւր առաջը  
 կտրող ծառաներին տէգի բուրժ ծայրով հրելով  
 այս և այն կողմ թափոտեց, Խնուսայ ջրով սնած  
 քուռակի ասպանդակները շարժեց ու ամբողջ բաց  
 դնով դուրս թռաւ:

Նրան կամեցան հետևել Մխիթար երէցը, և  
 Խաչիկի մի քանի բարեկամները, որ կրակոտ պա-  
 տանուն բռնելով ետ բերեն և աւելի ամուր ար-  
 գելանքի մէջ դնեն: Բայց հասնել չկարողացան.  
 Տէր Մխիթարը մինչև բերդապահներին պատու-  
 էրներ տալը բաւական ուշացաւ:

Իսկ Իշխանիկի ձին հովի պէս թռչում էր:



Պ.

Թոռնեանի հարաւում ընդարձակ դաշտի վրայ  
 անեղ պատերազմի տեսարան էր:

Բիւրաւոր թաթարներ ճակատել էին մի կողմ,  
 իսկ նրանց հանդէպ եօթանասուն հոգով սրամը-  
 տած կանգնած էր Խուլ Խաչիկը իւր իշխանական  
 դէնք ու զգեստով: Զինակիցները նրա հրամանին  
 էին սպասում:

Յապաղելու տեղը չէր. նա ձեռով ճակատը  
 շփելուց ետ թաւ աչքերը երկինք զցեց ու այսպէս  
 խօսեց.

— Ո՞վ Խուլ Խաչիկի հօր Աստուած, կը լը-  
 սե՛ս արգեօք խոնարհ խնդիրս այս ձերութեան  
 ժամին. անցած փայլուն օրերիս մինը չե՛ս վերա-  
 դարձնիլ ինձ, որ ամբարիշտ բարբարոսներին հաս-  
 կացնել տամ, թէ սակաւը միշտ կը յաղթի բա-  
 զումին, երբ Ստեղծողին իւր պաշտպան ունի:  
 Չէ՞ որ քո հին Առիւծն եմ, Տէր, և քո ստեղծած  
 սիրուն Թոռնեանը պաշարուած է: Աղաչում եմ,  
 տխմար իշխանների սրտով մի անիլ, որոնցից եր-  
 կուսը իմ որդիքն են...

Այս ասեց ու յարձակման նշանն ինքը տուեց:

Ինչպէս թղպերի մէջ պէ՛ծին-պէ՛ծին անող  
 փայլակ մի վայրկեանի մէջ մէկ թաթարաց բա-  
 նակի վերևում երևաց, մէկ ներքևում: Յետոյ ար-  
 շաւասոյք ձիու փունչոցը փոքրաթիւ զօրագնդի

մօտ վեր անելով մոնչաց ու թորերն ուռցնելով գոռաց.

— Դէ, սկսէնք, իմ քաջ թոռնեանցիք:

Ինչպէս աղեղի վրայից պինդ արձակուած նետեր՝ Սաշիկի արխախրա ընկերները պոկ եկան կանգնած տեղերից ու ձայն ձայնի տուած յարձակուեցին թաթարների վրայ: Սաշիկն ամենի առաջն էր. ճակատը դէմ արած հազարաւոր թըշնամու՝ լայնաշեղք թուրը գերանդու պէս ածուծ էր և ամեն մի ածելով գլուխ ու կուռ կտրում թոցնում. ահեղ ձայնով, ուժգին ծղրտոցով դազան թաթարներին սրտաթափ անում, սասանեցնում: Իմաստուն և հաւատարիմ ձին դէս ու դէն թեքուելիս տիրոջ տակին ճմճըմատում էր ու անշնչացած գիակները կոխտտելով թռչկոտում: Արեան գետեր էին հոսում դաշտի վրայով: Թաթարները որ առաջին անգամ Սաշիկին իւր փոքրաթիւ զօրքով տեսնելիս ծաղրել էին, այժմ իւրանց կոտորուածը տեսնելով՝ սպառնալից անախտ էին մնացել:

Թաթարների մահուան օրն էր կարծես. Սաշիկի ու ընկերների յուսահատ կռիւն ու ճարպիկութիւնը նրանց իսպառ զարհուրեցրել էին: Անթիւ թաթարներ արիւն-բրդուշ էին եղած. մնացածները Առիւծ Սաշիկի ձեռքից ազատուելու համար միակ հնարը գտնում էին փախչելու մէջ:

Բայց այդ շփոթ բոպէին ահա թէ ի՞նչ պատահեց ու մեր առիւծասիրտ Սաշիկի մէջքի սիւ-

նը կոտրեց: Յանկարծակի մի ձիաւոր ուրուրի պէս թուած հասաւ պատերազմի դաշտը. ճերմակ ձին քրտնքում կորած, իւր աչքերն էլ արիւնը կոխած՝ առանց մի բոպէ դադար առնելու, ընկաւ թաթարաց բանակի վրայ: Խիզախ ձիաւորը յանդուգն յարձակուեց անելով, ճշարով, գոչելով այնպիսի հարուածներ էր իջեցնում առաջը դիզուած զօրքի վրայ, որ գոռ բանակը փոթորկից փախս առած ամպերի պէս հալածուում, դէս ու դէն էր ցրւում: Ձիաւորի զրահը արծաթի պէս պըսպըղում էր. ինչպէս կատաղած առիւծ տեղը հանգիստ չէր մնում. ուժգին թափն անելով կամ խփում էր կամ կտրած գլուխները աջ ու ձախ շարտում: Նրա ծղրտոցն ու ձիու վրընջոցը աւելի խիստ էին քան նետ ու աղեղի ձայնիւնն ու ճարձատիւնը:

Խուլ Սաշիկը կռուի տաք ու բորբոք ժամանակ որ աչք չբարձրացրեց ու իւր պատանի Իշխանիկին արիւնարբու թշնամիների հետ կռուելիս, մարտնչելիս տեսաւ, մնաց երեխայի պէս տարեկուսած: Երկաթի պէս տղամարդը լալազին ձայնով գոչեց.

— Ա՛խ, իմ սիրուն Իշխանիկ, ինչո՞ւ անուշակալութիւնովդ մարում ես իմ տան ճրագը: Ինչո՞ւ անհամբերութիւնովդ ծերութեանս օրերի յաղթանակը սուզի ես ուզում փոխել: Տխմար տղայ, կարծում էիր թէ Առիւծ Սաշիկին կը յաղ-

Թե՛ն թաթարները, որ արգելանքից պատերազմի դաշտ ես փախել:

Մորմորուելով յոգոց էր հանում, գոչելով «Իշխանիկ» կանչում, բայց նրա ձայնը խեղդւում էր զրահների ճայթման և վահանների կոփման մէջ:

Ուշակալ կորիւնը այժմ դարձել էր խուլ. այնպէս տաքացած ու ոգևորուած էր, որ հօր ձայնը ամենեկին չէր լսում: Թաթարներով շրջապատած էր. պաշտպանուելու համար վահանիկը լիսեռի պէս ձեռին պտտում էր. անձի այդ պաշտպանակը նետերի հարուածներից արդէն ծակծրկուել էր: Դարձեալ հանգիստ առնել չէր ուզում. երկու անգամ յարձակուելուց ու անթիւ նախձիր գործելուց ետ մտադրւում էր երրորդ անգամ էլ յարձակուիմ անել ու ճանապարհ բանալով դէպի հայրը սլանալ:

Մեծ թափով երրորդ անգամ էլ գրոհ առեց առանց վահանի, սուսերամերկ, առաջն եկողներին տապալեց, կործանեց: Բայց այս անգամ թշնամիները գլխի ընկան, թէ ո՞վ է այս կատաղի ձիաւորը: Մանկահասակ դէմքին և գերբնական ուժին նայելով սկզբում երկնքից իջած հրեշտակ էին կարծել ու սարսել: Այժմ երբ տեսան, որ ծերունի Սաշիկը դէպի նա ողբաձայն կանչում է, իմացան որ նրա որդին է. ամենքը մի կողմից զագանաբար վրայ թափուելով կամեցան ձիուց պոկել և հաւի պէս փետրել:

Սակայն Իշխանիկը հեշտով չէր կախուում. նա ձեռի սուրը թշնամու գլխին կոտրելուց ետ սկսել էր բազուկները բանացնել: Այդտեղ միայն յոգնութիւն գոաց ուժեղ կորիւնը, թշնամու տէգերն ու նիզակները նարեկի պէս նրա վրայ գալով բազուկներն արդէն ջախջախել էին.

— Հասիր, հայր իմ, Իշխանիկդ մենակ է, լսուեց պատանու յուսահատ ճիշը:

Ձին, իմաստուն ձին խառնիխուռն ձայների միջից որոշելով իւր սիրելի տիրոջ հառաչը, կատաղաբար փունչալով առաջը կանգնողներին կոխոտեց. ուզում էր թշնամիների հոսանքից դուրս փախցնի դէպի հայ զօրազունը, ուր ականջները ցցած խրխնջում էր իւր ախոռակից մեծ ընկերը, Սաշիկի երիվարը:

Հէնց այդ րոպէին Իշխանիկի վրայ մի լայնաշեղք թուր շողաց և զօրեղ ձեռքի հարուածը վայր գլորեց նրան ձիուց: Սաշիկը որ մինչև այդ րոպէն յուսահատաբար կուռելով յաղթութիւնը տարած էր ու որդուն մօտենալու վրայ էր, տեսնելով այն անգութ հարուածը, հէնց իմացաւ աշխարհը գլխին մթնեց: Խելքը կորցրածի պէս աղիողորմ ճչաց ու ձիու վրայ կուշ եկաւ, կարծես աղիքները կարտուելիս: Պողուատի պէս ամուր ձեռները կսկծից թուլացան. թուրն ափի միջից ընկաւ...

Արիասիրտ զինակիցները առանց շիտթուելու իրանց մէջն առան թէ ձին, թէ իշխանին:

Թաթարները Իշխանիկի գէնքերն ու զարդե-  
րը կողոպտեցին, բոլորովին մերկացրին ու յետոյ՝  
մաս-մաս կտրտեցին նրա ծաղկափթիթ մարմինը։  
Միւս մասը ոգևորուած յարձակուեց Խաչիկի  
խմբի վրայ։

Առիւծ իշխանը ուշքը կորցրած ընկած էր  
տաղնապի մէջ։ Փոքրաթիւ զօրականները իրար  
մէջք տալով կռիւը շարունակեցին յուսահատա-  
բար։ Վերջ ի վերջոյ տեղի տուին անհամար դա-  
զաններէ առաջ, որպէս զի Մխիթար երէցի խոր-  
հրդին հետեւելով հասնեն Նկան, ամբողջ պաշա-  
պանեն, ուր պատսպարուած են գաւառի ժողո-  
վրդներէից հազարաւոր ընտանիքներ։

Թաթարները գտան Խուլ Խաչիկին հառաչե-  
լիս։ Վրէժինդբուծեամբ վառուած բաւական չը-  
համարեցին իշխանական հագուստները, գէնք ու  
զրահները կողոպտելը, այլ և դիւցազին անշնչաց-  
նելուց ետ մարմինը յոշոտեցին... Բարբարոսին  
վայել անարգ վրէժ։

Թաթարները Թոռնեանի տէրերին նահատա-  
կելուց ետ ապահով մտան գաւառը և սկսան ա-  
ւերել ու թալանել այստեղ, այնտեղ։ Բայց տես-  
նելով ժողովրդի քաջաքաջ դիմադրութիւնը, նրանք  
դրանից վատ բան գուշակեցին, մի գուցէ նոր  
Խաչիկներ լոյս ընկնեն ու երկրի մէջ ջարդ տան  
իրանց. շտապով որքան կարողացան մի օրուայ մի-  
ջոցում կողոպտել, կողոպտեցին, այդ աւարով բա-  
ւականանալով հեռացան Հեր և Զարեանդի կողմերը։

## ԺԱ

Տէր Մխիթարը որ Իշխանիկին հետեւելով չէր  
կարողացել նրա յամառութիւնը կտորել և Նկան  
վերադարձնել, պատերազմի դաշտն այն ժամանակ  
հասաւ, երբ քաջասիրտ կորիւնին անգթաբար յո-  
շոտել յարձակուում էին հսկայ Խաչիկի վրայ։

Լալ-աչքով տեսնելով իշխանի ողբալի դրու-  
թիւնը, զօրականներին խորհուրդ տուեց առանց  
յապաղելու իրան հետևել։

Քաջ երէցն իսկոյն մի քանիսի ուղարկեց այս  
ու այն կողմ, որ բնակիչներին զինելով ընդդի-  
մանան թաթարներին։ Մի քանիսին էլ նշանակեց,  
ու մօտակայ գիւղերի երեխանց ու կանանց բե-  
րեն ամբողջ։

Բիւրեղիկը մի խումբ աղջկերանց գլխաւորն էր,  
որոնք քար ու պարսուտով, բհիրներով զինուած  
քարայրերի զլիններին նստած հսկում էին իրանց  
հօտերին ու խաչներին։

Այդ աներկիւղ խմբերի քաջութիւնը թա-  
թարների աչքը այնպէս վախեցրեց, որ նրանք  
այժմ չնչին աւարով շատանալով հեռացան Թոռ-  
նեանից, միտները դնելով քիչ միջոցից ետ գալ  
և երկիրը տակն ու վրայ անել։ Նրանց աչքը մը-  
նացել էր Թոռնեանի գեղատեսիլ աղջիկների ու  
անթիւ հօտերի, նախիրների վրայ, որոնք ամիսս  
պրծան նրանց ձեռից։

Թաթարների հեռանալուց ետ երկիրը սուզի

մէջ թաղուեց. Թոռնեանցիք մնացին վիզները ճը-  
կած, սրաները տխուր իրար երես նայելիս: Ստա-  
ցած վէրքը մեծ էր և խոր: Խաչիկ ու Իշխանիկ  
էին կորցրել, մեծ թէ փոքր, կին թէ մարդ ամեն-  
քն էլ նրանց սուգն էին անում:

Թոռնեանի պահապան հրեշտակը այլևս չկար:  
Չկար նոյնպէս իրանց ապագայ յոյսը, քաջ Իշխա-  
նիկը:

Մխիթար երէցը լալով ժողովեց հօր և որ-  
դու արիւնաշագախ մարմինները, ողջ գաւառի  
ժողովրդեան առաջ հողին պահ տուեց նկան ամ-  
բոցի եկեղեցու գաւթում: Իշխանիկին համբուրելով  
պարկայրեց հօր ծոցում ու դարձաւ ժողովրդին  
ասեց:

— Թոռնեանի սգաւոր ժողովուրդ, առանց իմ  
ասելու, դուք գիտէք թէ Առիւծ Խաչիկը իւր  
աշխարհը ինչպէս էր սիրում, նրա անկախութեան  
համար քա՞նի կռիւներ է մղել: Տեսաք նոյնպէս  
թէ նրա կորիւնը, արժանաւոր գաւակը ինչ անձ-  
նութիւթեամբ հօրը գերազանցեց: Պատանի Իշ-  
խանիկը այն հերոսութեան օրինակը ցոյց տուեց,  
որի նմանը Վասպուրականը իւր ստեղծման օրից  
ոչ տեսել է և ոչ լսել: Խաչիկի աւագ և միջնակ  
որդիքը ապերախտ վարմունքով ժառանգեցին ա-  
ռաքինի հօր անէծքը: Խաչիկն անիծեց իւր որ-  
դոց, որոնք իրանց նախնեաց երկիրը թողած գը-  
նացին օտարին ծառայելու և մուրացկանութեամբ  
փառք վաստակելու: Խաչիկի անէծքին ես էլ այ-

սօր կցում եմ իմ նզովքը: Թող այդ անէծքն ու  
նզովքը ծանրանան Հասանի ու Ճնճղուկի գլխին,  
քանի որ օտարասէր կը մնան ու վրէժխնդիր չեն  
լինիլ թաթարներին իրանց հօր և եղբօր արեան  
համար:

— Մենք ևս անիծում ենք, միաբերան ասին  
ժողովրդի ձերերն ու պառաւները. յետոյ նրան-  
ցից ամեն մինը մօտեցաւ, համբուրեց Խաչիկի և  
Իշխանիկի հողաբլուրը ու խորին տխրութեամբ  
հեռացաւ իւր տունը:

Այդ դէպքից ետ Մխիթար երէցի սրտին  
սուր խփէին՝ արիւն չէր կաթիլ: Առանց իշխանի  
ու Իշխանիկի Նկան բերդը տանջարան էր թւում  
նրան: Ամբոցի ամեն մի անկիւնը անթիւ քաղցր  
յիշատակներ էր վերանորոգում և դառնութիւնով  
նրա սիրտը լցնում: Այդ կսկիծն անկարող էր  
տանել: Վերկացաւ խեղճ երէցը, գնաց բնակա-  
րան հաստատեց այն ձորի քարայրում, որի շրջա-  
կայքում Բիւրեղիկն արածեցնում էր իւր գառները:

Երէց ու գառնարած՝ մինը ձերունի, միւսը  
պատանի իրար սիրում, իրար մխիթարում էին և  
Թոռնեանի կորած փառքերը յիշելով տխուր օրերը  
մթնացնում:

ԺԲ.

Եօթ տարին անցած ութն էր գնում, Թոռնե-  
ւանի կորիճները դեռ դեղերում էին կ. Պօլսում:  
Հայ զօրականները զգուել էին պանդխտութիւնից,



նրանք վաղուց վերադարձած կը լինէին Վասպուրական, եթէ Հասան ու Ճնճղուկը խորամանկ կայսեր խոստումներով հրապուրուելով չխաբուէին ու տարին տարու վրայ չմթնացնէին:

Վերջապէս վատանշան Միքայէլը գլորուեց, գնաց. նրա մահից ետ միայն նրանք էլ խելքի եկան, զգացին իրանց տխմարութիւնը: Նոր մտածեցին երիտասարդ իշխանները հայրենիք վերադառնալու վրայ:

Տխուր էին նրանք, ինչպէս յուսախար. որովհետև սպասած փառքերն ու պատիւները չըստացան. Այդ վշտին աւելանում էին հայրենիքի կողմերից լսուող աւերածութիւնները: Քանիցս յիշեցրել էին կայսրին, որ Վասպուրականը անտէր է, շրջակայ վայրենի ցեղերից հարստահարութիւններ է կրում. կամ մի քաջ և բարեմիտ կառավարիչ ուղարկէ կամ իրանց թոյլ տայ, որ գնան իրանք թշնամիներին հալածեն և հայրենի երկիրը կառավարեն:

Կայսրը հաստատ կամք չէր տալիս և ճրգճգում էր: Նրանք էլ ճարահատեալ սպասում էին: Կայսրը մահացաւ:

Երբ Հասանն ու Ճնճղուկը իրանց յոյսերի մոխրի վրայ նստած՝ փռշտանելով մտածում էին. յանկարծ Բաբելը, իրանց հին ծառան լոյս ընկաւ. նրանց առաջ Թիսուր-արտում, էլ չէին իմանում, գետնից բսաւ, թէ երկնքից իջաւ: Իրանց վշտերը փարատելու համար դեռ ցանկանում էին հայրե-

նիքից, տանից լուրեր հարցնել, ապա թէ գալստեան պատճառն իմանալ, բայց Բաբելը խոնարհ ողջունից ետ այսպէս սկսեց պատմել նրանց հայրենիքի մասին.

— Մեծ իշխանը չկայ այլ ևս, թաթարներն էլ, անխ, սպանեցին: Թաթարներն եկան Թոռնեանն աւերելու, ժողովրդով առաջներն ելանք, չթողինք:

Մի թար երէցը, որ մեծ իշխանի սիրելին էր, նրանց թաղեց ու ձեզ նզովեց: Այդ նզովքը ձեր գլխից չախտէ է հեռանայ, մինչև դուք ձեր աշխարհը չղառնաք: Մեծ իշխանը յոյս ունէր, որ դուք կը գար, իւր հողսը կը թեթևացնէք, աշխարհը կը կառավարէք: Թշնամիքը ձեր բացակայութիւնից օղուտ քաղելով, թափուեցին Թոռնեանի սահմանները, մեզ մօտ ոչ գօրք կար, ոչ յոյն կառավարիչ... Ամենն էլ թողել էին մեր աշխարհը անպաշտպան և հեռացել կայսեր քաղաքը, մինչև անգամ դուք մեր հայ գնդով: Այդ ժամանակ մեծ իշխանը դառն սրտամտութեամբ անիծեց ձեզ իբրև օտարասէրների և ինքը գէնք վերցնելով եօթանասուն չափահաս ընկերների հետ գնաց բիւրաւոր թաթարների գէմ պատերազմելու, մեր աշխարհի սահմաններից նրանց քշելու:

Այս խօսքերը որ Հասանն ու Ճնճղուկը լսեցին՝ այնպէս դառան, կարծես վշտի ու կակիծի ձեռից կատաղած: Երկուսով ծնկներին խփելով գոչեցին լալազին.

—Արդար էր մեր հայրը. մենք տխմար էինք ու ապերախտ: Արժանի ենք թէ անէծքի և թէ նզովքի: Մեր յանցանքը զրանցով չի քաւուիլ, և մեր մահով չի վերջանալ. այդ նզովքը պէտք է անջնջելի տառերով գրել մեր ճակատներին և մեր գանգերը Վասպուրականի բարձր ժայռերի վրայ անկել, որ եկող սերունդները մեր անմիտ և յիմար ընթացքը կարդալով շարունակեն նզովել մեզ: Տխմարի պէս թողինք մեր քաղցր հայրենի աշխարհը թշնամու բերանում ու եկանք մեր զօրքով օտարին ծառայելու, օտարի լուծը յօժարակամ կրելու:

—Հասան, գոռաց ճնճղուկը խոշոր աչքերը սրբելով, վեր, վերցրու զօրքդ, գնանք Թոռնեան:

—Կնանք, եղբայր ջան, կրկնելով և գրկելով եղբօրը, լաւ է ուշ, քան երբէք. աւելորդ է այսուհետև ուրիշին յոյս կապելը: Թըած այն բոլոր հայերի վրայ, որոնք թաթարի, արաբի, յոյնի ձեռից այսքան հարստահարուելուց, վաստուելուց ետ դարձեալ խելքի չեն գալ, կը շարունակեն նրանց ձեռ կարկառել և նրանցից ողորմութիւն խնդրել: Յոյնը բաց աչքով մեզ կուսակալ կարգողը չէ, այն էլ Վասպուրականի վրայ և ոչ էլ մեր աշխարհը թաթարներից ապահովացնողը. բաւական էր, որքան մեր սահմանն ու աշխարհը խլեցին մեր ձեռից պարսիկը, արաբը, յոյնը: Այժմ էլ թոյլ տանք թաթարը ապականի մեր սիրուն երկիրը: Չէ, հերիք էր այդ անմիտ ընթացքը: Արի

մի անգամ կրկնենք մեր հօր սիրելի խօսքը— «սահման քաջաց, գէնն իւրեանց»: Եթէ մեր կտրճութիւնով մինչև այժմ կայսրներն են օգտուել, փառաւորուել, ինչո՞ւ այդ շնորհքը այսուհետև գործ չղնենք այն աննման աշխարհի օգտին, որից ստացել ենք:

—Գնանք եղբայր, ձեռը մեկնեց ճնճղուկը. ինքներս հալածենք մեր աշխարհից թաթարներին և ինքներս լինենք մեր երկրի խնամակալը: Բաւական էր, որքան մեր Սենեքերիմի պէս թագաւորների, մեզ պէս իշխանների թուլութիւնից օգուտ քաղելով մեր վրայ խնամակալ դարձան կոպիտ արաբը, ողորմելի պարսիկը և նենգաւոր յոյնը:

Այսպէս զղջալով Թոռնեանի կտրիճները իրանց սխալ վարմունքի վրայ՝ ուխտեցին թողնել Կ. Պոլիսը և վերադառնալ հայրենիք:

Եւ դարձան:

**ԺԳ.**

Հայրենի ձիւնապատ լեռները երևալուն պէս Հասանի ու ճնճղուկի սրտերը թունդ-թունդ եղան: Մինչ հայ զօրականները հայրենիքի պոռնուկը հասնելով ծունը էին գրել, որ մայրենի քաղցր հողը համբուրեն, Հասանը զգացուած սրտով դարձաւ եղբօրը.

—Ճնճղուկ, աննման եղբայր, մեզ ամօթ է հայրենի հողը մտնել, մինչև մի խոստում չանենք:

— Ի՛նչ խոստում, քաջ Հասան, հրամայիր, ամեն տանջանք, ամեն խոստումն յանձ կառնեմ, միայն հօրս անէծքից ազատուելու հնար գտնեմ: Հասանը շարունակեց.

— Հայրենիք ունենք խլուած, գրաւ դրուած, հայր ու եղբայր ունենք թշնամու ձեռով նահատակուած: Ի՞նչ ես ասում, եղբայր, չպահանջե՞նք մեր պապերի երկիրը, յետ չառնենք մեր սիրելիներէի արիւնը:

— Հապա թողնե՞նք: Անշուշտ ամեն վտանգ յանձն առնենք, միայն թէ մեզանից մեր հօր անէծքը վերացնենք: Ասա ի՞նչ անենք, Հասան եղբայր, ասն:

— Ահա, ճնճղուկ եղբայր, ինչ անենք. մեր փայլուն հանդերձի վրայ հազնենք այս սև շորը և սուգ պահենք: Այն ժամանակ միայն դէն դցենք մեր վրայից այս սուգի նշանը, երբ թաթարներից մեր հօր ու եղբօր արեան փոխն առած կլինենք, իսկ եթէ անկարող ենք այդ անելու, թող ուրեմն ծանրանայ մեր գլխներին մեր հօր անէծքի հետ և Տէր Մխիթարի նզովքը: Այս սուգի շորը մեզ պէս ապերախաների կեանքը սեպնելով թող անբաժան մնայ մեզանից մինչև զերեզման:

— Համաձայն եմ, թող ասածդ լինի, պատասխանեց ճնճղուկը և լալով Հասանի վզով փաթաթուեց:

Երկու եղբայրն էլ սգաւորի հագուստով, դառնացած սրտով մտան Վասպուրական.

— Աւա՛ղ մեր կեանքին, սրտամորմոք դոչում էր Հասանը, հայրս ու աշխարհս մեր դարձին էին ապաւում, որ մեր յաջողութիւններով փառաւորուեն, ցնծան. այժմ չկայ ոչ առիւծ Խաչիկ, ոչ կորիւն-Իշխանիկ: Նրանց աչքերը փակելուն էլ արժանի չեղանք. սրբան քամբաղդ ենք: Կարօտ մնացինք թէ եղբօր վերջին խօսքի և թէ հօր օրհնութեան:

— Եղբայր, թողնենք լացը, ասեց ճնճղուկը, մեզ վրէժինդրութիւն է պէտք. արտասուելու ժամանակ չէ. Նկոնն արդէն երևում է ու մեզ վրայ արեան պարտականութիւն դնում: Ահա այն ճանապարհները, որտեղ պատանեկութեան ժամանակ ձիավարժութեամբ և նետաձգութեամբ ենք պարապել: Ահա իշխանական ապարանքը—մեր ծննդավայրը, ահա և անագ աշտարակի դուռը, բայց կանաչ-կարմիր դրօշակը ամբողջի գլխին չի ծածանում: Եղբայր իմ, ամեն տեղ ամայութիւն է...:

Երբ մօտեցել էին ամրոցին, սգաւոր կորիճներին մուտքի մօտ դիմաւորեց մի կոյս աղջիկ՝ մաղախն ուսին. հագուստն անպաճոյճ, բայց հրեշտակից չքնաղ: Սկսեց այսպէս խօսել:

— Ողջոյն ձեզ սիրուն աշխարհի անկարեկից իշխաններ, ողջոյն ձեզ Առիւծ իշխանի ապերախտ գաւակներ:

Հասանն ու ճնճղուկը անվրդով լսեցին համարձակ աղջկայ այդ կշտամբանքները. այնքան

վշտացած էին, որ անզամ թւում էր թէ իրանց սրտերը թեթևութիւն էին զգում այդ խօսքերից:

Բիւրեղիկն էր այդ աղջիկը, որն սկսեց շարունակել.

— Թոռնեանի աղջիկներն անզամ պարզերես են ձեզանից. նրանց պահ տուած գառները, խաշները անվսաս են, խկ ձեզ պէս կտրիճների յուսով թողած աշխարհն այս խեղճ օրին է, օտարասէր հոգիներ: Արդեօք զուր չէ՞ր Տէր Մխիթարը ձեզ վրայ յոյս դնում, թէ դուք կարող էք Սենեքերիմի կորցրած աշխարհը ետ առնել: Արդեօք զուր չի՞ սպասում ծերունի երէցը ձեր օրով տեսնել վասպուրականի ազատութիւնը:

— Խելօք կոյս, թախծալից աչքերը բարձրացնելով խօսեց Հասանը, այդ դև չես խօսում, քեզ խօսեցնողը Թոռնեանի ազատարար հոգին է. այժմ այն ասա, ի՞նչ անենք որ նզովքից ու անէծքից թեթևանանք:

— Ահա թէ ինչ, խօսեց աղջիկն աներկիւզ, քանի որ Արծրունեաց տոհմի նշանակը օտարի ձեռին գերի է, ոչ առիւծ-Սաշիկը գերեզմանում կը խողազուի և ոչ քաջամարտիկ Իշխանիկի շիրմի վրայ շուշան ծաղիկ կը բսնի: Դուք ձեր ախմար ընթացքով հօր ու եղբօր մահուան պատճառը եղաք. այժմ պէտք է նրանց շունչ ու հոգի պարզելէք: Եթէ անկարող էք նրանց կեանքը վերադարձնել, ապա ամենաթանկ բանը, մեր աշխարհի ոտնակոխ եղած պատիւը պէտք է վերա-

կանգնեցնէք ու իշխանական խլուած գէնքերը, ահմական զարդերը ետ խէք թաթարներից:

Բիւրեղիկն այս խօսքերը ասելուց ետ խոնարհ գլուխ տալով կամենում էր հեռանալ, զօրէ՛ղ Հասանը բոլորովին նուաճուած համարձակ հովուուհու փարթամ գեղեցկութիւնով՝ մեղմ խօսեց:

— Դու կարելի է կարծում ես, Թոռնեանի դուստր, որ քո յանդիմանական խօսքերը մեզ զայրոյթ են պատճառում. ամենևին ոչ. անհոգ կաց, երևում է հօրս ու քաջ Մխիթար երէցի հոգուց կտօր ունես, նրանց աշակերտել ես: Ասան, համարձակ ասա, սիվքեր կան այժմ հօրս հաւատարիւ՛մ ընկերներից կենդան ու ողջ:

Բիւրեղիկը թուեց մի քանի անուններ:

— Այժմ ազատ ես, ասեց Հասանը, գնա Մխիթար երէցին իմաց տուր, որ դայ ամրոցը:

— Ոչ Մխիթար երէցը և ոչ այլ ոք չեն մտնիլ Նկան ամրոցը, մինչև չստան որ Հասան և շնճղուկ իշխանները թաթարներից առել են ծերունի Սաշիկի և պատանի Իշխանիկի արեան վըրէժը, պատասխանեց Բիւրեղիկը և մի ակնթարթում անյայտացաւ առաջներից՝ խած իւր հետ տանելով հսկայազօր Հասանի ուշքը միտքը:

**ԺԴ.**

Այդ օրուայ երեկոյեան Նկան ամրոցի աւագ աշտարակում խորհուրդ կազմուեց: Խորհրդի ո-

ըողումն այս էր—նախ՝ Թոռնեանի շրջակայ գա-  
ւառներում իմաց տալ իշխանների գալստեան  
մասին, երկրորդ՝ մի ձիաւոր ուղարկել Հեր և  
Զարեանդ, որ ասի թաթարներին թէ՛ Հասանն ու  
Ճնճղուկը այլ ևս չեն գալու, Թոռնեանը մնացել  
է անտէր:

Այսպէս անելու խորհուրդն այն էր, որ թա-  
թարներին խաբեն: Նրանք որ լսէին թէ ամեն  
բարեկէներով լի Թոռնեանը անտէր է, քաղցած  
զայլերի պէս ոռնալով կը վազէին կողոպտելու:

—Թաթարներին պատժելու միակ հնարը այն  
է, որ իրանց երկրից կարողանանք դուրս հանել,  
ասում էին խորհրդականները:

Հասանը հաւան կացաւ այս խորհուրդին և  
իսկոյն հնար մտածեց. կանչեց իւր մօտ քուրդ  
ուէսին, որ իրանց հին բարեկամն էր և քաջասիրտ  
մարդ:

Սկաւ քուրդը, խոնարհ ողջունելով Հասանին  
ոտի հողը համբուրեց:

—Ինչ ես հրամայում, իշխան, իմ գլխի տէր:

—Ռէս, հօրս հին բարեկամ, ահա տալիս եմ  
քեզ հազար դահեկան ոսկի և գիտե՞ս ինչ եմ  
խնդրում:

—Անպատճառ զօրք կամ օգնութիւն, վրայ  
բերեց բարեսիրտ քուրդը:—Օ՛, Հասան իշխան,  
չես կարող իմանալ թէ իմ սիրտը սրբան է ցա-  
ւել Առիւծ իշխանի ու կորիւն Իշխանիկի մա-  
հուան վրայ:

—Ոչ, չիմացար, ես զօրքի չեմ կարօտ, ոչս,  
այլ վրիժառութեան, հօրս ու եղբօրս սպանող-  
ների արեան: Հասկանո՞ւմ ես:

Իւր միտքը մանրամասն բարեկամ քուրդին  
յայտնելուց ետ ասեց.

—Նստիր ձիդ, գնա Հեր և Զարեանդի թա-  
թարների մէջ պտըտիր և շարունակ Թոռնեանցոց  
բամբասիր: Ամեն կողմ ձայն գցիր, թաթարի մեծ  
ու փոքրին պախարակիր. «Ի՞նչ էք պարապ ան-  
շարժ նստել, ասա, ահա Թոռնեանը բարեկէներով  
լի ու անտէր, գնանք, աւերենք, գերենք անա-  
սուններ, հարս ու աղջիկներ...»

—Աչքիս ու գլխիս վրայ, ասեց քուրդը և  
խոնարհելով մինչև գոտիկ, շողշողուն ոսկիները  
ծոցը լցրած շտապեց իւր տուն:

### ԺԵ.

Հետևեալ օրը քիւրդ ուէսը ծպտուած, ձիու  
քամակը թռած՝ նետ ու նիզակ ճոճելով իջաւ  
Հեր և Զարեանդ:

Թաթարներին մի անգամ ասելը բաւական  
էր, էլ կարիք չկար խօսքով նոր համոզելու, քա-  
նի որ կողոպուտի քաղցը համը դեռ նրանց ա-  
տամների տակն էր: Քուրդի հրաւերի վրայ հող  
ու քար իրար գլխի տալով ասանուհինգ հազար  
թաթարներ երկու օրում իրար կողոշտ հաւաքուե-  
ցին: Ամենն էլ զինուած թափուեցին Վասպու-  
րական, որ ամբողջ Թոռնեանը, քանի որ Հասանն

ու ճնճողուկը չեն եկել, կողոպտեն, այրեն, Խաչիկի պէս իշխանի երկիրն էլ անհետ անեն:

Թաթարները՝ ամենն էլ հեծեալ, մտել էին Թոռնեանի գիւղերից մինը, ուզում էին կողոպտան սկսել, յանկարծ նրանց ականջով ձիանոնց տրոփիւն ընկաւ: Հինգ հազար սպառազէն զօրք գալիս էր հանգէպի կողմից: Անտէր ու որբ մնացած Թոռնեանից այդքան կտրիճների դուրս գալը սարսուռ գցեց խուժադուժ Թաթարների սըրտերը:

Հասանը վիթխարի հասակով մի կրակոտ երիվարի վրայ գօրքի առջից ընթանում էր և առիւծի նման ընչացքները կրծելով մոնչում:

Ճնճողուկը նոյնպէս շքեղ սպառազինուած, սուզի նշանը Հասանի պէս զրահով պատ գցած գօրքի մի մասի առաջ ման էր գալիս ձիով և խրոխտ ձայնով ոգևորում: Թաթարները կողոպտելու միտքը թողած պատրաստուեցին կռուի:

Երկու բանակները ճակատ-ճակատի կանգնած սրտատրոփ սպասում էին պատերազմի նըշանին: Հասանը ճնճողուկի հետ երկու խօսք ասելուց ետ, համբուրեց նրան իբրև վերջին հրաժեշտ և իսկոյն երկու բանակի մէջտեղը դալով գոռաց դէպի թշնամիք որոտաձայն.

— Թէպէտ մեզանից երեք անգամ շատ էք, միայն իմացէք որ կռուելու ենք մինչև վերջին հոգու մեռնելը: Նախ քան կռիւն սկսելը— ասացէք, ո՞վ է այն մարդը, որ հօրս յոշոտել է: Թող

դուրս գայ մենամարտենք, կամ արեան վրէժն առնեմ, կամ ես էլ նրա սրով մեռնեմ:

Առ ժամ Թաթարաց զօրագունդը կատաղի ծովի պէս ալեկոծուեց: Բայց շատ չքաշեց բազմութեան միջից յանկարծ դուրս թռաւ մի հսկայամարմին խափշիկ՝ ընտիր նժոյգի վրայ: Կերպարանքն աւելի ահարկու էր քան թէ սպառազինութիւնը:

Սա զարհուրական ձայնով պատասխանեց Հասանին.

— Հօրդ սպանողի՞ն էիր ուզում, ահա ասիկ ես եմ: Թէ կասկածում ես, լաւ նայիր, ահա այս նրա ձին, այս էլ նրա թուրն ու դրօշակը: Եթէ գնւր չի խրոխտալդ, եթէ վախկոտ հայ չես, առաջ արի, սո և տար:

Այս խօսքերի վրայ Թաթարները հպարտացան, փքուեցին. իսկ հայերից ոմանք սոսկացին ու վախեցան:

Այն ինչ Հասանն էր՝ տեղն ու տեղը ամենի առիւծ դառած վրէժ գոռաց: «Վրէժ» գոռալը, ակնթարթում վրայ հասնելն ու խափշիկին գետին տապալելը մէկ արեց: Թուրն այնպէս իջեցրեց, որ խափշիկի թանձր մարմինը երկու կէս եղաւ ու սրի ծայրը զեռնին առաւ:

— Ա՛խ, յանգուգն արարած, դու էիր մնացել քո կեղտոտ լափը թափես հայ իշխանի գլխին:

Հօր ձին, զրահն ու զէնքերը խլելով կայծակի արագութեամբ դարձաւ իւր բանակը:

Հայ զօրականները ցնծացին ու աւելի սըր-տովացան: Իսկ Ճնճղուկը, որ քիչ առաջ հերսից տեղը չէր կարողանում հանգիստ կանգնել, եղբօր յաջողութիւնից խրախուսուած առաջ եկաւ ու դէպի թշնամի բանակը բարձրաձայն գոչեց.

— Ձեզ եմ ասում, արիւնարբու թաթարներ, եթէ քաջութիւն ունէք, տուէք իմ ձեռն այն մարդուն, որ սպանել է իմ Իշխանիկ եղբօրը. կամ ես մեռնեմ կամ նա:

Նրա հրաւերի վրայ այժմ թաթարների բանակից դուրս եկաւ մի անեղակերպ պարսիկ: Ճնճղուկին արհամարհելով տմբարտաւանի պէս պատասխանեց.

— Եղբօրդ սպանողին ես ուզում, անա ես եմ, լաւ տես: Բայց խելքդ ուրիշի վրայ չգնայ, զգո՛յշ կաց, թէ չէ եղբօրդ հացից կուտացնեմ: Ահա եղբօրդ ձին, անա նրա դրօշակն ու նշանն էլ թևիս: Ահաւասիկ նրա զէնքերը: Եթէ սիրտ ու տղամարդութիւն ունես և սուտ չէ պարծենալդ, առաջ արի ու խլիր:

Ճնճղուկը մի վարկեան աչքերը երկինք ուղղած գոչեց.

— Ծերունի հօրս Աստուած, հօ՛ գիտես ի՞նչ սրբազան կրակ է վառ գցել սիրտս: Քեզ եմ կանչում, ոյժ տո՛ւր, պատանի եղբօրս արեան վրէժն առնեմ, ապա թէ...

Դեռ խօսքը չաւարտած հոժկու Ճնճղուկը

թափն արած դիմեց դէպի ասպարէզում կանգնած հակառակորդը:

Կայծակի արագութեամբ հասաւ պարսկին, որ դեռ շարունակում էր հայհոյանքը պիղծ բերանով: Սուրը մի անգամ վրայ բերելով այնպէս խոր կտրեց ուսից դէպի կուրծքը, որ թշուառ պարսիկը ճապաղած մնաց: Ճերմակ ձին տակից հանելով, վրայից էլ եղբօր նշաններն ու զէնքերը խլելով գոհ և ուրախ դարձաւ իւր բանակը:

Սափշիկի ու պարսիկի սատակելը տեսնելով թաթարներն արդէն վախակալել փախչելու էին պատրաստուում:

Բայց գոռոզ զլխաւորները իրանց շատութեան վրայ յոյս դրած մնացին, որ կռուելով յաղթութիւնը տանեն:

Հայ զօրագունդն էլ վաղուց ծարաւ էր հայրենիքի թշնամու արիւնը խմելու:

Հէնց այդ ըոպէին Հասանն ու Ճնճղուկը աջ ու ձախ թևերն անցնելով՝ իւրաքանչիւրը մի կողմից գոռացին:

— Դէ՛ քաջ զինուորներ, դէ՛ հայ կարիճներ, անա՛ջ, անահ, աներկիւղ, միասին կռուենք, միասին մեռնենք:

Այս խօսքերը լսելով, հայ զօրքերը գրոհ տուին, գոռացին և իշխանների հետ թաթարների վրայ ընկնելով, իրար ետևից փոռտեցին թշնամիների լէշերը: Մի քանի ժամուայ մէջ դիակները թէւք հորս հազարից անցաւ: Մնացածներ

ըր, որը վիրաւոր, որը սարսափահար հազիւ շուն-  
չը բերաններին կարողացան պատերազմի դաշ-  
տից գլուխներն ազատել ու փախչել դէպի Կոլ-  
ղուաց երկրի խորքերը:

Հասանն ու Ճնճղուկը հետևելով հալածեցին  
փախչողներին ու բոլոր նրանց երկիրը աւարի ու  
հրդեհի մատնելով վերագարձան Թոռնեան:

**Ժ. 2.**

Հասանն ու Ճնճղուկը յաղթանակով հայրե-  
նի գաւառը մտան. ժողովուրդը գոհութեան և  
օրհնութեան ձայներով նրանց ղեմաւորեց: Աղ-  
ջիկները զարնանային սիրուն ծաղիկներ էին թա-  
փում նրանց ոտների տակ: Ժողովրդից որը հաց  
մեկնելով էր ողջունում նրանց գալուստը, որը  
աղ. իսկ շատ խաշնատէր ու տաւարատէր էլ նը-  
րանց առաջ գառներ ու արջառներ էին մորթում,  
հեան էլ այսպէս բարեմաղթում.

—Սրանք ձեր ցաւը տանեն, կտրիճ իշխան-  
ներ: Տայ Աստուած առիւծ Խաչիկ գառնաք, մեր  
սիրուն հող ու ջուրը մշտական ձեր ձեռին ա-  
պահով պահէք:

Այդ միջոցին, բազմութեան միջից անսպա-  
սելի կերպով առաջ եկաւ ծերունի Մխիթար ե-  
րէցը և իշխաններին ողջունելով խօսեց:

— Այժմ տեսնում եմ, որ առիւծ Խաչիկի  
հարազատ որդիքն էք: Հաւատում եմ, որ ձեր  
հայրը կը ների ձեզ և իւր անէծքը ես կ'առնի

ձեր ազգօգուտ ընթացքը տեսնելով՝ ես ևս ետ  
եմ կոչում նզովքս և մեղաւոր բերանովս օրհ-  
նում ձեր կեանքը, որ ապրէք ու Սենեքերիմի  
կորցրած թագն ու աշխարհը վերագարձնէք: Այ-  
սուհեաւ ես հանդիստ կը մեռնեմ, որովհետև աչ-  
քովս տեսնում եմ Թոռնեանի փառքի կենդանա-  
նալը: Ապրէք յաւէտ, անմահ զիւցազի քաջարի  
որդիք:

Իսկոյն Հասանն ու Ճնճղուկը շոքեցին և ա-  
ռան Մխիթար երէցի աջը: Բոլոր ժողովրդի ներ-  
կայութեամբ երէցը հանելով նրանցից սուգի սև  
շորերը, փոխարէնը հագցրեց թշնամու ձեռից  
խլած Խաչիկի ու Իշխանիկի գարդերը, նշաննե-  
րը և ապա գլխներին «Պահպանիչ» ասեց:

Հանդիսաւոր գնացքը շարժուեց դէպի Նկան  
ամրոցը. ցնծութեան աղաղակներից օդը թնդում  
էր: Հեռուից երևում էր ամրոցի բարձր աշտա-  
րակի գլխին ծածանուող դրօշը:

Ահա և երևաց Բիւրեղիկը գառնարած աղ-  
ջիկների հետ.

— Իշխաններ, մեզնից էլ ընծայ ստացէք այս  
անարատ, անմեղ գառները, ասեց Բիւրեղիկը և  
գրկից մի սիրուն գառնուկ վայր դրեց: Նրա հետ  
և միւս աղջիկները:

Բիւրեղիկի վրայ ցնծալով նայեց Մխիթար  
երէցը և ասեց.

— Ափսոս, քեզ Թոռնեանայ դուստր, որ քո  
շնորհքիդ ու իմաստութեանդ համեմատ վիճակ



շունես: Ո՞ւր էր թէ քո չափ մեր իշխանագն աղ-  
ջիկները հայրենիքի ցաւը հասկանային և նեղ օ-  
րերին ազատարար շունչ փչէին վհատող հոգիներ-  
ըն վրայ:

— Անհող մնա, տէր հայր, պատասխանեց  
Հասանը սիրով Բիւրեղիկի վրայ նայելով, իւր  
շնորհքի համեմատ վիճակ կունենայ թոռնեանայ  
Բիւրեղիկը, և իշխանուհիները սրտերի մէջ իւր  
ուզած շունչը կը փչի:

— Ի՞նչպէս, իշխան, հարցրեց ծերունի երէ-  
ցը միամտաբար, այդ ի՞նչպէս կը լինի:

— Ինչո՞ւ չի լինիլ, տէր հայր: Հապա եթէ  
առիւծ Սաշիկի հարսը դառնայ, դարձեալ չի  
լինիլ:

— Ինչո՞ւ չի լինիլ, իշխան, պատասխանեց  
բարի երէցը. բայց դա երազ բան է, ո՞վ է տե-  
սել երազը կատարուի:

— Տէր հայր, Աստուած երազն ինչո՞ւ է ստեղ-  
ծել, որ հազարից մինն էլ չկատարուի. եթէ նե-  
ղութիւն քաշես Բիւրեղիկին մէկ երկտասարդ իշ-  
խանի հետ պսակես, կը կատարուի:

Ինձ բոլորովին զարմացնում ես, իշխան, խօ-  
սեց Մխիթար երէցը, լսածիս չեմ հաւատում:  
Պարզ ասա, հասկանամ: Ասենք թէ մի րոպէ Բիւ-  
րեղիկը հարսնացուն է, պսակողն էլ ես, բայց ո՞վ  
պէտք է լինի փեսացուն:

— Հէնց ես, տէր հայր, վրայ բերեց քաջ

Հասանը և Բիւրեղիկի աջ թիւը բռնելով մտաւ  
Նկան ամբողջը:

Խուռն բազմութեան առաջ Մխիթար երէցը  
կատարում էր դառնարած Բիւրեղիկի և Հասան  
իշխանի պսակի ս. խորհուրդը. և ուրախութեան  
արտասուքները աչքերից վարար-վարար վէր  
ածում:



Բ Ը Յ Ա Տ Բ Ե Լ Ի Բ Ը Ռ Ե Բ

Ալարկոտ—ծոյլ  
 Ականջը հալել—տեղեկացնել  
 Արեկող—արևի դէմ  
 Բհիր—հաստ ձող  
 Գայլագուաւ—ազուաների չար տեսակը  
 Գառագիղ—երկաթէ վանդակ  
 Գլխից հանել—մոլորեցնել  
 Զառամել—ծերանալ  
 Թալանել—կողոպտել  
 Թարթափն ընկնել—սոսկում զգալ  
 Թրաշողում—թրերով կռիւ  
 Լայնաշեղբ—լայնաբերան  
 Լիսեռ—ճախարակի իլիլի վրայի շրջանակը  
 Խափշիկ—սեամորթ  
 Խէթ աչքով նայել—նախանձ զգալ  
 Խուժել—թափուել  
 Ծղրտոց—բարձր սուր ճիչ  
 Ծմակ—խոր անտառ  
 Կարկամել—լուել  
 Կապարճ—նետաման  
 Կծղել—չորութիւնից կուշ գալ

Հեզել—գիր կապել  
 Հէսկի—սրունգի փաթաթան  
 Հոզեհան—հրեշտակ  
 Զէտ—առիւծի ազի  
 Զապաղած—թուլացած  
 Զմճըմատել—ճոճուել ծանրութեան տակ  
 Մաղախ—տոպրակ  
 Մղկըտալ—մորմոքուել  
 Նախճիր—կոտորած  
 Նարեկ գալ—սալի վրայ մուրճերով երկաթը մի  
 որոշ կէտում ծեծել  
 Նետողներ—յարձակուողներ  
 Շանթել—հարուածել  
 Շկահիւն—կոուի շփոթ, ճարձատիւն  
 Շամփրած պահել—խիստ տազնապի մէջ դնել  
 Շրմփացնել—ուժով զարկել  
 Որջ—զազանի բոյն  
 Ոճորբ—առաստաղ  
 Ուրուր—բազէի մի տեսակը  
 Պաճիճ—սրունգի վրայ հագնելու բրդէ գործուածք  
 Պարսուտ—պարսատիկ, քար զցելու գործիք  
 Պինչ—բիթ-բերան միատեղ  
 Սիրտը բարձր ու ցածր լինել—վրդովուած լինել  
 Վրչալ—տնքալ, տրտնջալ  
 Տակն անել—ջրասոյց լինել  
 Յաք ու ցրիւ անել—հալածել  
 Փնչալ—ուժգին շնչել  
 Քիթը քաշ անել—տխրել  
 Օրոն անել—պաշտպանուել:

# ՄԱՏԵՆԱԽՕՍՈՒԹԻԻՆ

ՔԱՄԱԼԵԱՆՅ Ս.-ի «ՄՈՈԿ ԽԱՉԻԿ»

Պատմական վէպիկ.

Գիւնն է 25 կող.

Մեր մանկական մատենադարանը հարստացաւ մի նոր հրատարակութիւնով ևս: Մի տասնեակ տարի առաջ իւրաքանչիւր հայ մանկավարժ վարանքի մէջ էր՝ թէ ի՞նչ տայ արդեօք իւր պատանի ընթերցողներին կարդալու: Մինչև այդ ժամանակ եղած պատանեկական ընթերցանութեան գրքերը ըստ մեծի մասին անձոռնի և աղճատ թարգմանութիւններ էին, որոնց նիւթն ու հողին օտար էր հայ մանկան համար:

Աղճատ թարգմանութիւններ և օտարախորթ բովանդակութեամբ գրքերի հրատարակութեան դարը դեռ չէ վերջացել, այսօր այդ ծաղկում է մի առանձին զօրութեամբ: Այս հանգամանքում շատ բնական է, որ հայ ծնողներն ու դաստիարակները մի առանձին եռանդով փնտրեն և ի լոյս ընծայեն այնպիսի երկեր, որոնք թէ նիւթով և թէ բովանդակութեամբ բոլորովին հայկական են:

Քամալեանց Սը. հէնց այս տասնամեայ շըր-

ջանի պատանեկան ընթերցանութեան գոհարները մատակարարողն է եղել: Նրա հէքեաթները մեր մանկական գրադարանների գարդն են այսօր: Ինքը հայ գիւղացու որդի, հայ դպրոցի աշակերտ, տասնեակ տարի հայ գաւառներում թափառած և կեանքն ու լեզուն ուսումնասիրած լինելով ամենայն յարմարութիւն ունի մանկական ընթերցանութեան նիւթեր հրատարակելու: Յարգ հրատարակուած հէքեաթների յաջողութիւնն ևս մի մի սպասոյց է գրանց նպատակայարմար և խնամքով կազմուած լինելուն: Նոյն հեղինակի «Ծովինար» հէքեաթի երկորդ հրատարակութիւնն արդէն իսկ սպառուելու վրայ է:

Մեր մանկական գրադարանի աղքատութիւնն աչքի առաջ ունենալով վաղուց արդէն Թիֆլիզում մի խումբ անձինք կամենում էին հրատարակելու նպաստել և լոյս ընծայել մանկական գրքեր:

Քամալեանց Ս.-ի այս փոքրիկ գրքոյկի բովանդակութիւնը պատմական մի անցք է մատչելի լեզուով և ձևով պատմուած:

Վասպուրական աշխարհի յունաց ձեռքն անցնելու օրերում նշանաւոր էր Թոռնեանի իշխան Սուլ Սաչիկը. սորա երկու մեծ որդիքը հրապուրում են կայսեր ծառայութեամբ և գնում են Կ. Պօլիս, իսկ ձերունի հայրը և ամենափոքր որդին մնում են հայրենիքում և զոհ են լինում յարձակուող Սելջուկ թաթարներին: Ապերախտ որդիքը

դառնում են հայրենիք յուսակտուր և զղջացած:

Սորանք ժողովրդի հետ միանալով վրէժ են առնում և ազատում իրանց հայրենի ժառանգութիւնը:

Վէպիկի գործող անձինքներից մէկն է Մխիթարիկ երէցը, հեղինակի ստեղծած ախլ, որ դաստիարակ է Սաչիկի կրտսեր որդուն:

Այս երէցի տուած խրատները մի պատմական գեղեցիկ դաս է:

Հեղինակը պատմական աւանդութիւնից շեղուելով մտցրել է նոյնպէս և մի հայ գեղջկուհու տիպար, որ կոչուում է Բիւրեղիկ:

Ամբողջը մի գեղեցիկ դաս է հայոց պատմութեան, մի դաս՝ որ պատմուած է պատանիներին հասկանալի ոճով և Քամալեանցին յատուկ հայերէն ժողովրդական լեզուով: Հեղինակը նիւթն առել է Սմբատ պատմագրից, ուր Սուլ Սաչիկի մասին բաւական երկար պատմուած է:

Այս առաջին անգամն է, որ մեր հէքեաթաբանը փորձ է անում պատմական անցքերից նիւթ քաղել և բաւական յաջողութեամբ:

Հայ մանուկների մատենադարանի համար «Սուլ Սաչիկը» մի գեղեցիկ և օգտակար զարդ է:

Գրքոյկի հրատարակութիւնը կատարուած է խնամքով, տպագրական սխալների թիւը շատ չնչին է, թուղթը և տպիւն մաքուր:

Ս. Քարամեանց.

1864 թ. մարտի 7 Արձագանք» № 52.

ՀՀ Ազգային գրադարան



NL0369940

ԱՌՄԵԶԻՆ ԳՐԲՈՅԿՆԵՐՈՎ ԼՈՅՍ ՏԵՍԱՆ  
ԱՇԽԱՏՈՒԹԻՒՆՆԵՐՍ.

60324

1.	Աստուած չը ճանաչող . . . . .	1
2.	Անմեռ աշխարհ . . . . .	8
3.	Աստուած ազքատի կերպում . . . . .	20
4.	Գալօ ափօ, սպառուած . . . . .	10
5.	Երկու ազրերացեղ. բ. տպագ. . . . .	30
6.	Ժամանակը ոսկի. պատկերողորդ. . . . .	40
7.	Ծովինար. բ. տպագ. սակաւաթիւ . . . . .	20
8.	Հէքեաթներ. . . . .	30
9.	Շէն թագաւոր. բ. տպագ. . . . .	20
10.	Սիրելի հերոս կամ բաջ Աղասի . . . . .	25
11.	Սուլ Սաչիկ. բ. տպագրութիւն . . . . .	25
12.	Փոքր գրուածներ ա. կապուկ. . . . .	40

Հարցնել Թրֆլիսի գրավաճառների մօտ.

Մեծ քանակութեամբ գնողներին նշանաւոր ջուժ: Դրմեկ հեղինակին. հասցէն՝ Ներս. դպրան Ուս. Քամուխանց Ա.

Տպագրութեան համար պահուս էն

1, Ազգային առակներ (10 հատ): 2, Հէքեաթներ բ. կապուկ. 3, Կոուի ինձոր, պատմ. վէպիկ: 4, Վարդան կամ գիւղի երէց, պատմ. վէպիկ:

891.99  
Բ-17